

萬有文庫

第二集七百種

王雲五主編

明詩紀事

(十一)

陳田輯

商務印書館發行

卷

萬有文庫

第二集七百種



商務印書館發行

公用圖書  
愛惜使用

明書詩紀事

(一十)

陳田輯



空軍軍官學校圖書館

登錄號 114

類號 083.17



Handwritten signature and the number 220.

I.D.O.C.A.F.C.S. LIB.

1107

~~#810.727 / 7560~~

# 811.1046 / 7560



821.86

775

23  
v.11

明中葉有李、何、猶唐有李、杜。宋有蘇、黃、空同詩如巨靈、夙、夙、鑿石開山。大復詩如美女、嬋娟、傾城絕代。皆一代作者也。其時又有徐昌穀、邊廷實、王子衡、康對山、王漢陂、稱七才子。論者謂弘、正兩朝人才傑出。如王伯安之理學勳業。楊升菴之博雅直節。王道思、唐荆川之文章。書苑則祝允明。畫家則沈文、仇、唐皆足以凌跨宇內。炳燿一代。至詩家別有蘇門、君采、稚欽、鴻山、少玄、百泉輩。余私有論次。另為一集云。光緒丁未仲冬。黔靈山樵陳田。

明詩紀事  
丁籤序



國家圖書館



004759981



# 明詩紀事丁籤目

## 卷一

李夢陽十首 夢陽與何景明徐禎卿邊貢王廷相康海王九思號  
 七子七子中去王廷相加朱應登顧璘陳沂鄭善夫號十子

何景明五首

## 卷二

徐禎卿十首

## 卷三

王廷相二十四首

康海九首

## 卷四

鄭善夫三十一首

孫一元三十七首

## 卷五

邊貢三十七首  
 朱應登七首  
 王九思九首  
 張琦十三首

顧璘 二十四首  
金陵三俊

王章一首

卷六

伍晏一首

靳貴一首

鄭瓘二首

王統一首

劉愷一首

梁燾一首

張乾一首

鄭岳四首

許天錫四首

鄭汝美一首

姜芳一首

陳沂三首

錢福二首

楊旦一首

童琥一首

林夔一首

唐臣一首


方玘一首

何孟春四首

秦金一首

陳玉一首

方璘一首





卷七

許讚一首

劉麟四首

張羽五首

熊卓四首

黃相一首

郭東山二首

范兆祥一首

楊毓一首

羅鳳一首

卷八

林廷模一首

劉蒞一首

孫緒二首

劉瑞二首

劉玉七首

黃衷一首

朱諫二首

唐錦一首

黎鳳一首

龍霓一首

陳洪謨一首

劉龍二首

林廷梈一首

周倫三首

謝廷柱二首

張鳳翔一首

李廷梧一首

胡文璧一首

卷九

游潛二十八首

符錫二首

鄭鵬一首

魯鐸七首

徐問六首

林茂達一首

陳霆一首

范嵩一首

潘希曾一首

都穆一首

陳伯獻二首

程銓一首

陳則一首

趙善鳴一首

李廷相一首

周用十三首

李時一首

王尙綱一首

孫偉三首

金賢一首

卷十

董玘一首

張邦奇八首

殷雲霄十五首

張鵬一首

蔡潮一首

陳錫二首

蕭世賢一首

穆孔暉一首

黃鞏一首

索承學二首

田登一首

卷十一

沈周三十六首

顧應祥二首

徐縉六首

安磐七首

樂護一首

易舒誥八首

鄭銘一首

陳鼎一首

劉寓生一首

孟洋四首

周宣一首

方獻夫二首

文徵明三十四首

唐寅九首

卷十一下

陶成一首

王寵二十首

卷十二

祝允明五首

黃雲五首

張靈一首

史忠一首

徐霖二首

景卿一首

卷十三

王守仁十七首

湛若水三首

豐坊六首

陸深六首

蔡羽九首

雷鯉五首

陳鐸一首

郭詡一首

高濂一首

何塘一首

崔銑一首

卷十四

石存禮四首  
海岱詩社

劉淵甫一首

黃卿四首

陳經一首

陳鑑四首

吳昂一首

徐咸二首

陳瀛一首

卷十五

史鑑十二首

程玄輔一首

李孔修一首

董澐二首

劉澄甫二首

馮裕一首

楊應奎一首

朱朴十二首  
小瀛洲社

錢琦一首

徐泰一首

鍾梁一首

方太古六首

朱曜一首

謝承舉六首

周恭一首

薛章憲一首

魏備二首

史自守一首

羅燾四首

陳蒙二首

戴冠一首

王烈三首

王鎰一首

姚旬一首

鄭達一首

崔激一首

卷十六

杭濟一首

韓邦奇一首

謝復一首

倪復二首

莫止四首

錢百川一首

張鈇一首

徐岳一首

晏良用一首

邢參二首

吳玃一首

羅周一首

趙善諫一首

杭淮七首

韓邦靖六首

方鵬一首

傅汝舟七首

卷十七

張詩三首

程誥三首

姜玄一首

趙香一首

陳璽一首

方鳳六首

傅汝楫一首

鄭作二首

戚韶一首

童琇一首

童璫一首







# 明詩紀事卷一

## 丁籤

### 李夢陽十首

夢陽字獻吉。慶陽人。弘治癸丑進士。授戶部主事。遷郎中。以劾張鶴齡繫獄。尋宥出。代韓文草疏。劾劉瑾。謫山西布政司經歷。復撫他事。下獄得釋。瑾誅。起故官。出爲江西提學副使。坐作宸濠陽春書院記削籍。天啓中。追諡景文。有空同集六十六卷。

四庫總目。夢陽才力富健。足以籠罩一時。

橫雲山人史稿。弘治時。李東陽主文柄。天下翕然宗之。夢陽譏其萎弱。倡言文必秦漢。詩必盛唐。與何景明、徐禎卿、邊貢、朱應登、顧璘、陳沂、鄭善夫、康海、王九思。號十才子。又與景明、禎卿、貢海、九思、王廷相。號七才子。

大復集。空同有超代軼俗之見。其高者不能外前人。下者已踐近代。夫意象應曰合。意象乖曰離。空同丙寅間詩爲合。江西以後詩爲離。丙寅間作。叩其音。尙中金石。江西以後之作。辭艱者意反近。意苦者辭反常。色澹黯而中理披慢。讀之若搖鞞鐸耳。國寶新編。李獻吉朗暢玉立。傲睨當世。讀書斷自漢魏以上。故其詩文卓爾不羣。晚始汎濫諸家。益濟宏博。或失則僞。矯枉之偏。不得不然耳。

王廷相家藏集。李獻吉以恢闊統辯之才。成沈博偉麗之文。游精於秦漢。割正於六朝。執符於雅謨。參變於諸子。用成一家之

言。遂能掩蔽前賢。命令當世。

黃省曾五岳山人集。先生古賦騷選樂府。古詩漢魏覽眺諸篇。逼類康樂。近體歌行。少陵太白。往匠可凌。後哲難繼。明興以來。一人而已。

升菴集。唐子元薦與余書。論本朝之詩。李何一出。變而學杜。壯乎偉矣。然正變雲擾。而剽襲雷同。比興漸微。而風騷稍遠。藝苑危言。李獻吉詩。如金鵝擘天。神龍戲海。又如韓信用兵。衆寡如意。排蕩莫測。國朝習杜者。凡數家。華容孫宜得杜肉。東郡謝榛得杜貌。華州王維楨得杜筋。閩州鄭善夫得杜骨。然就其所得。亦近似耳。唯獻吉具體而微。

四溟詩話。李獻吉極苦思。垂成。如一二句弗工。卽棄之。田深父見而惜之。獻吉曰。是自家物。終久還來。國史唯疑。正德七年九年。黃河連清。李夢陽詩云。今瑞定於今帝運。世人休擬聖人生。蓋婉辭也。至嘉靖改元。始直書其事。爲入繼大統之祥云。紫蓋復從嘉靖始。黃河先爲聖人清。

詩談。關中李夢陽。崧高之秀。上薄青冥。龍門之派。一瀉千里。獨其論黃陳。不香色。而時不免自犯其言。詩藪。李獻吉詩文。山斗一代。其手闢秦漢盛唐之派。可謂達磨西來。獨闢禪教。又如曹溪卓錫。萬衆皈依。馮時可元成選集。空同歌行。縱橫開闔。神於青蓮。七律雄渾豪麗。深於杜陵。異色絕煇。吾無間然。

張焯談藝錄。李獻吉雄豪壯麗。如長江巨浸。滔滔千里。雖有枯槎敗筏。無妨飄蕩。

明詩選。陳臥子曰。獻吉志意高邁。才氣沈雄。有籠罩羣俊之懷。其詩自漢魏以至開元。各體見長。然崢嶸清壯。不掩本色。其源蓋出於秦風。李舒章曰。獻吉以雄厚之思。發清剛之氣。如華岳秋高。奇雲秀彩。變動不竭。古詩樂府。純法漢魏。下及阮謝。無不神合。近體則專宗少陵。然于合處。反見其離。於離處。反見其合。孫枝蔚四傑詩選。王元美謂律至獻吉而大。其大者。若冬日象山書院。人亡故國。還祠廟。世異陰崖。尙品題。臺寺夏日。雲雷畫壁。丹青壯神鬼。虛堂世代遙。熊監察至自河西。封事幾騰大北極。籌邊眞歷地。西頭繁臺次。秦氏韻草錄。梁臺猶殿閣。花殘宋苑只宮牆。皆氣象高古者也。

王士禎古夫子亭雜錄。錢牧翁撰列朝詩。大旨在尊西涯。貶李空同。李滄溟。又因空同而及大復。因滄溟而及弇州。索垢指瘢。不遺餘力。夫其駁滄溟擬古樂府擬古詩是也。并空同東山草堂歌。而亦疵之。則妄矣。所錄空同集詩。亦多泯其傑作。黃省曾吳人。以其北學於空同。則擯之。於朱浚溪。應登。顧東橋。璘輩。亦然。予竊非之。

明詩別裁。空同五言古。宗法陳思康樂。然過於雕刻。未極自然。七言古雄渾悲壯。縱橫變化。七言近體。開合動盪。不拘故方。準之杜陵。幾於具體。故當雄視一代。錢受之詆其模擬剽賊。等於嬰兒之學語。至謂讀書種子。從此斷絕。吾不知其爲何心也。馬星翼東泉詩話。北地七言歌行。最爲擅場。如漢京篇。去婦詞。士兵行。皆有杜陵之風。起調尤工。其送李中丞赴鎮。黃雲橫天。海氣惡。前飛鵬。後叫鶴。陰風夜撼。警無閤。曉來雪片如手落。送李帥之雲中。黃風北來雲氣惡。雲州健兒夜吹角。將軍按劍坐待曙。紇于山。搖月半落。起調相同。亦有轍迹可尋。

田按。空同志壯才雄。目短一世。好摎擊人。而受人摎擊亦甚。然究一時才傑。亦不能出其右也。成弘之間。茶陵首執文柄。海內才俊。盡歸陶鑄。空同出而異軍特起。臺閣壇坫。移於郎署。始猶依違。不欲顯然攻之也。贈昌穀崢嶸百年會詩云。我師崛起楊。與李力挽一髮回千鈞。大賢衣鉢豈虛擲。應須爾輩揚其塵。至西涯六十壽詩。則僅文章班馬。則道術孟顏。醇二句。頌其文章。而絕藝邕斯上。高情頡籀鄰。一揮驚霹靂。隻字破風塵。絢練王侯宅。蒼茫海嶽濱。幽劓光沕窟。巨榜照嶙峋。星燦將軍碣。雲垂學士珉。崖題半吳楚。墨刻徧齊秦。等句。專頌揚其書法。軒輊已見微意。及西江放廢後。茶陵已歿。乃放言不諱。作朱浚溪墓志云。一時篤古之士。爭慕響臻。而執政顧不之喜。惡抑之。北人樸恥乏黼黻。以經學自文。曰。後生不務實。卽詩到李杜。亦酒徒耳。而柄文者。承弊襲常。方工雕浮靡麗之詞。取媚時眼。見浚溪等古文詞。愈惡抑之。曰。是賣平天冠者。凡號稱文學士。率不獲列於清銜。陰欲困之。北人謂劉文靖。柄文者謂茶陵也。平心而論。茶陵詩文。固自可傳。而空同復古之功。亦不可沒。從古文人相輕。由來已然。論者固不必爲之左右袒矣。

邃菴辭

蓀壁兮桂宇。藥椽兮在下。水滴滴兮溜渠。蘭葳蕤兮當戶。菴之構兮何所。接紫闥兮崇期。菴何爲兮閉寂。窈芬楣兮參差。蔽修櫳兮連延。錯瓴甃兮委蛇。穆空洞兮內啓。豁廉隅兮外直。曲巷前通兮。嘉樹後植。邇莫可探兮。遐乎可卽。匪邃曷名兮。厥惟菴德。菴中兮何有。玉佩兮青衿。惠我人兮。不貌以心。適我人兮。可矣。可楨。可棟。可楹兮。維菴是學。赤帷兮翠幃。菴中人兮西遊。斗暉暉兮晝揭。嶽巖巖兮夕秋。予邊鄙兮賤夫。悵瞻菴兮弗早。幸門牆兮未塵。矢貞心兮恆保。

田按邃菴。楊公應甯爲中書舍人時。讀書之室也。因以爲號。李西涯倡爲之解。吳匏菴。謝方石。爲之銘。林見素爲之說。靳戒菴。爲之序。張伎陵爲之賦。楊月湖爲之跋。邵二泉爲之贊。而空同子爲之辭。東沂陳玉。華亭顧清。嘉禾呂憲。廣陽馮清。建業劉麟。和順王雲鳳。杜旻。錫山陳策。清苑傅珪。東川劉春。維揚朱應登。東萊毛紀。上蔡李遜學。爲之詩。今錄王雲鳳詩。附空同辭後云。菴何爲者。名之邃。客有問予對以意。長安甲第臨大道。畫桷羣飛瓦鱗次。豪奢買屋兼百家。猶嫌走馬無餘地。朝歌暮管隔巷聞。金鞭玉轡籠街至。邃菴先生半畝宮。其門一間前後四。最後南扉中置几。左右經史兼圖記。心遠自無車馬喧。吏隱誰知鴻鷓志。北面白首亦執經。千里青衿來問字。明珠在浦聲價高。寶劍貯匣光銑利。飄忽風塵二十春。故廬今日屬何人。邃菴號已。在天下。邵子行窩到處新。

功德寺

宣宗昔行幸。遊戲玉泉傍。立宇表巖嶺。開池荷芰香。波樓遞蹙沓。風松奏笙簧。百靈具來朝。落日錦帆張。

萬乘雷霆動。千巖滅流光。綺繡錯展轉。翠旗杳低昂。法眷撞鐘鼓。宮女拭御妝。笙鏞沸兩岸。星斗宿巖廊。至尊奉太后。國事付三楊。六軍各晏眠。百官守舊章。巡非瑤水遠。跡豈玉臺荒。嗚呼百年來。回首一慨傷。鳳騰赤霄暮。龍歸竟茫茫。山風撼網戶。紫殿生夜霜。退朝值沐休。我行暫翱翔。娟娟登岸林。慘慘度石梁。廢道哀湍寫。松柏間成行。啓鑰肅覽歷。過位增悲涼。積久灑埽缺。乳鴿鳴膳堂。舊時琉璃井。倒樹如人長。神已佐上帝。教猶託空王。鈴磬颯鳴夏。晨昏禮相將。盤遊非聖禮。操縱在先皇。至今朝廷上。不改舊紀綱。

劉侗帝京景物略。玉泉山功德寺。李西涯記云。寺故金護聖寺。寺七殿。殿九楹。楹以金地彩其上。宣德中。板菴禪師重建也。師能役木球大如斗。輪轉行馳。登下委折。如日脛具。逢人躍躍。如首稽叩。師曰。入某侯門。則入募金若干。曰。入某戚里。則入募金若干。宣宗召入。命爲木球使者。賜金錢。遂建巨刹。曰功德寺。時臨幸焉。

### 內教場歌

雕弓豹韃騎白馬。大明門前馬不下。徑入內伐鼓。大同耶。宣府耶。將軍者許耶。解一武臣不習威。奈彼四夷。西內樹旗。皇介夜馳。嗚砲烈火。嗟嗟辛苦。解二

田按正德六年。畿內賊起。京軍不能制。調邊兵。大同遊擊江彬。因錢甯召見。彬狡黠強狠。談兵帝前。帝大悅。擢都指揮僉事。出入豹房。同臥起。盛稱邊軍驍悍。於是調遼東。宣府。大同。延綏。四鎮軍。號外四家。縱橫都市中。每團練大內。閒以角觝戲。帝戎服臨之。八年。命許泰領敢勇營。彬領神威營。賜彬國姓。彬復薦萬全都指揮李琮。陝西都指揮神周勇略。召侍豹房。同賜姓爲義兒。建義子府。又說東西兩官廳於禁中。視團營。領以泰等四人。號義子四鎮軍。帝自領羣闈善射者。爲一營。號中軍。晨夕馳逐。

呼譟聲達九門。甲光照宮苑。空同內教場歌。紀其事也。空同又有道逢熊豹鷹狗進貢詩云。赤豹黃熊貢上方。虞羅致爾自何鄉。微軀亦被雕籠縛。遠視猶聞寶絡香。名鷹側目思翻掣。細犬搔毛欲奮揚。隨侍近收擊鵲校。上林新起戲虛坊。此亦武宗時事。

士兵行

豫章城樓饑啄鳥。黃狐跳跟追赤狐。北風北來江怒湧。士兵攫人人叫呼。城外之人徙城內。塵埃不見章江塗。花裙蠻奴逐婦女。白奪釵環換酒沽。父老向前語蠻奴。慎勿橫行王法誅。華林桃源諸賊徒。金帛子女山不如。汝能破之惟汝欲。犒賞有酒牛羊豬。大者陞官佩綬趨。蠻奴怒言萬里入爾都。爾生我生屠我屠。勁弓毒矢莫敢何。意氣似欲無彭湖。彭湖翩翩飄白旗。輕舸蔽水陸走車。黃雲捲地春草死。烈火誰分瓦與珠。寒崖日月豈盡照。大邦魍魅難久居。天下有道四夷守。此輩可使亦可虞。何況士官妻妾俱。美酒大肉吹笙竽。

國史唯疑江西苦調到狼兵掠賣子女其總兵張勇以童男女各二人送費文憲家費發憤疏聞請嚴禁誦李夢陽士兵行諸篇情狀具見

玄明宮行

今冬有人自京至。向我道說玄明宮。土木侈麗誰辦此。乃令遣臬京城東。割奪面勢創截業。出入日月開。幟幟矯託敢與天子競。立觀忍將雙闕同。前屹石柱雙蟠龍。飛梁透迤三彩虹。寶構合沓殿其後。儼如山。

嶽翔天中。金銀爲堂。玉布地。千門萬戶。森相通。光景閃爍。倏忽異。雲煙鬼怪。芄杏濛。以東金榜祠。更侈樹之松。檟雙梧桐。溟池島嶼。鯁鯉躍。孔雀翡翠。兼熊熊。那知勢極有消歇。前日虎豹。今沙蟲。窗扉自開。衛不守。人時遊玩。搖玲瓏。陛隅龍獸。折其角。近有盜換香鑪銅。青苔生泥。鏡面鎖。野鴿哺子。雕花櫳。憶昔此閣。握乾柄。帝推赤心。閹罔忠。威刑霹靂。縉紳毒。自尊奴僕。侯與公。變更累朝。意叵測。培克四海。真困窮。長安奪地。塞巷陌。心復豔。此閣何蒙。構結擬絕。天下巧。搜剔遂盡。輸倖工。神廠擇木。內苑竭。官阮選石。西山空。夷墳伐屋。白日黑。揮汗如雨。斤成風。轉身唾罵。閣得知。退朝督勞。何匆匆。人心嗟怨。入骨髓。鬼也孰復安。高崇。峩碑照耀。頌何事。或有送男充道童。聞言愴惻。黯無答。私痛聖祖。開疆功。渠干威福。開者誰。法典雖嚴。奈怙終。錦衣玉食。已叨竊。琳宮寶宇。將安雄。何宮無碑。鐫護敕。來者但看。玄明宮。

名山藏。司禮監劉瑾。請地數百頃。費數十鉅萬。作玄明宮。朝陽門外。以祝上釐。復請貓竹廠地。五十餘頃。毀民居千九百餘家。掘人塚二千五百餘。築室僦民。聽其宿倡賣酒。日供贍玄明宮香火。

### 石將軍戰場歌

清風店南逢父老。告我已巳年間事。店北猶存古戰場。遺鏃尙帶勤王字。憶昔蒙塵實慘怛。反覆勢如風雨至。紫荊關頭晝吹角。殺氣軍聲滿幽朔。胡兒飲馬彰義門。烽火夜照燕山雲。內有于尙書。外有石將軍。石家官軍若雷電。天清野曠來酣戰。朝廷旣失紫荊關。吾民豈保清風店。牽爺負子無處逃。哭聲震天風

怒號兒女牀頭伏鼓角。野人屋上看旌旄。將軍此時挺戈出。殺敵不異草與蒿。追北歸來血洗刀。白日不動蒼天高。萬里煙塵一劍掃。父子英雄古來少。單于痛哭倒馬關。羯奴半死飛狐道。處處懽聲噪鼓旗。家家牛酒犒王師。應追漢室嫖姚將。還憶唐家郭子儀。沈吟此事六十春。此地經過淚滿巾。黃雲落日古骨白。砂礫慘澹愁行人。行人來折戰場柳。下馬坐望居庸口。卻憶千官迎駕初。千乘萬騎下皇都。乾坤得見中興主。殺伐重開再造圖。姓名應勒雲臺上。如此戰功天下無。嗚呼戰功今已無。安得再生此輩西備胡。

明詩別裁石亨跋扈伏法。臣節有虧。要之戰功不可埋沒。上皇返圖。實由尙書之守。將軍之戰。作者特爲表出。中云。還憶唐家郭子儀。以不失臣節愧之也。此作者微意。

奉送大司馬劉公歸東山草堂歌

東山有草堂。縹緲雲嶠孤。前對祝融峯。下瞰巴陵湖。明公昔時此堂居。麋鹿熊豕當窗趨。洞庭日落風浪湧。倒影射堂堂欲動。慘淡誰聞紫芝曲。獨善不救蒼生哭。先帝親裁五色詔。老臣曾受三朝祿。此時邊檄多戰聲。曳履謁帝登承明。謝安笑卻淮淝敵。魏相坐測單于兵。九重移榻數召見。夾城日高未下殿。英謀密語人不知。左右微聞至尊羨。自從龍去不可攀。公亦臥病思東山。湘娥含笑倚竹立。山鬼窈窕堂之側。上書苦死只欲歸。聖旨優容意悽惻。內府盤螭縷金織。賜出傾朝皆動色。白金之錠紅粟記。寶鈔生硬鴉翎黑。崇文城門水雲白。是日觀者塗路塞。城中冠蓋盡相送。塵埃遮斷長安陌。人生富貴豈有極。男兒要



在能死國。不爾抽身早亦得。君不見漢二疏。千載想慕傳畫圖。卽如草堂何處無。祿食覩竊胡爲乎。乃知我公眞丈夫。嗚呼。乃知我公眞丈夫。

田按華容劉忠宣東山草堂莊定山爲之題扁李西涯有東山草堂前後賦何大復楊石淙邊華泉何燕泉有寄贈留題詩附錄於此定山詩云封題雲臥東山扁歌詠司空表聖詩天闕星辰遺舊履橋洲歲月有殘棋石橫流潦潛蚪角梅迸垂蘿屈鐵枝自笑野人閑袖手雲煙濃淡忽交馳西涯歌云少而行兮老則歸脫繡服兮披荷衣今吾故吾兮何是非桂棟兮蘭房君歸來兮此堂山可履兮水可航彼胡爲兮天一方楚之水兮荆山望佳人兮不還翩然兮歸來躡岵巒兮弄潺湲何大復詩云一疏歸來臥舊山幾回天上識容顏城邊黃石留侯去海內蒼生謝傅閒日月夢隨天闕仗煙波家在洞庭灣南瞻江漢無多路不得乘槎一往還石淙詩云南北萍蹤六載奇故人顏采夢中疑如何遠客尋幽地剛及東君駐馬時別去定應懸一榻相逢還爲解雙頤東山合有蒼山念况復勳名鬢未絲華泉詩云靄靄東山雲覆彼山下堂乘時播皇澤從龍彌八荒八荒遼且邈下上以邀翔龍逝鼎湖陰雲歸故山陽何以慰烝庶私衷鬱彷徨草堂何所有有蘭復有芝采采山之側飛仙相與期寄傲雲霞間可望不可追抗手謝城市去去從此辭徒遺高世風永繫來哲思燕泉詩云唐朝綠野相宋代獨樂公起居候夷狄姓字傳兒童古人不可作誰是閒世雄我公雖晚出德器正爾同來歸下覽鳳去志冥飛鴻東山在何許亦在東門東

戲作放歌寄別吳子吳名廷舉字獻臣蒼梧人

惟昔少年時。彈劍輕遠遊。出門覽四海。狂顧無九州。獻策天子賜顏色。錫宴出入黃金樓。揚鞭過市萬馬辟。半醉唾罵文成侯。結交盡是扶風豪。片言便脫千金裘。彎弓西射白龍堆。歸來洗刀青海頭。崑崙河磧不入眼。拂袂乃作東南遊。江海洶湧浸日月。島嶼蹙沓混吳越。匡廬小瑣拳可碎。鄱陽觸怒踢欲裂。澤中

龍怪能人言。噴濤吹浪昏漲天。大鵬舉翼四海窄。笑爾弋人何慕焉。東湖子。君非泆忍闍穆取位之丈夫。余亦豈卑卑與世而浮沈。恂復共鬪非庸劣。廉藺終投萬古欽。攀鱗埽氛代不乏。我豈復戀頭上簪。鹿門黃犢穩足駕。商顏紫芝山固深。有飛儻附秋空音。

藝苑卮言。李獻吉爲戶部郎。以上書極論壽甯侯事下獄。賴上恩得免。一夕醉過侯於大市街。罵其生事害人。以鞭稍擊墮其齒。侯恚極。欲陳其事。爲前疏未久。隱忍而止。獻吉詩云。半醉唾罵文成侯。蓋指此事也。

### 秋懷

苑西遼后洗粧樓。檻外芳湖靜不流。亂世君臣那在眼。異時松柏自深愁。雕闌玉柱留天女。錦石秋花隱御舟。萬古中華還此地。我皇親爲掃神州。

西河詩話。遼后梳粧臺。址在太液池東小山上。一名瓊花島。卽今白塔寺址是也。嘗讀元時金臺集。爲葛邏祿迺賢所作。中有粧臺詩甚佳。廢苑鶯花盡。荒臺燕麥生。韶華如逝水。粉黛憶傾城。野菊金鈿小。秋潭玉鏡清。誰憐舊時月。曾向日邊明。自注云。粧臺在昭明觀後。金章宗嘗與李妃夜坐。上曰。二人土上坐。妃應聲曰。一月日邊明。故云。則知是臺本遼時后妃遊憩之所。不止蕭太后也。李空同秋懷詩。苑西遼后洗粧樓。徒以叶調之故。易梳粧爲洗粧。易臺爲樓。遂致土人文士爭名是非。且有誤指橋南諸閣爲洗粧樓者。文筆之不可輕下乃耳。

### 秋望

黃河水遶漢邊牆。河上秋風雁幾行。客子過濠追野馬。將軍弣箭射天狼。黃塵古渡迷飛輓。白月橫空冷

戰場聞道朔方多勇略。只今誰是郭汾陽。

藝苑卮言。空同集。是獻吉自選。亦多駁雜可刪者。余見李嵩憲長稱其黃河水繞漢邊牆一首。李開先少卿誦其逸詩凡十餘首。極有雄渾流麗。勝其集中存者。

### 何景明五首

景明字仲默。信陽人。弘治壬戌進士。授中書舍人。遷吏部員外。出爲陝西提學副使。有大復集三十八卷。

四庫總目。正嘉之間。景明與李夢陽俱倡爲復古之學。天下翕然從之。文體一變。然二人天分各殊。取徑稍異。故集中與夢陽論詩諸書。反覆詰難。斷斷然不相下。平心而論。摹擬蹊徑。二人之所短略同。至夢陽雄邁之氣。與景明諧雅之音。亦各有所長。正不妨離之雙美。不必更分左右袒也。

空同集。大復詩。徒知神情會處。上筆成章爲高。而不知高而不法。其勢如搏巨蛇。駕風螭。步驟卽奇。不足訓也。國齊新編。仲默弱冠入京。身不勝衣。馳才長賦。便凌作者。觀其與李氏論文。直取舍筏登岸爲優。斯將盡棄法程。專崇質性。賦咏著述。互見短長。自古恆然。匪徒今日。若乃天才騰逸。咳唾成珠。實亦人倫之雋。

王氏家藏集。大復欲騷儷選。俛視六朝。溫醇典雅。丰容色澤。靡不備舉。

升菴集。仲默枕藉杜詩。不觀餘家。其於六朝初唐。未數數然也。與予及薛君采言及六朝初唐。始恍然自失。詩談。何景明上追漢魏。下薄初唐。大匠揮斤。羣工斂手。

沈懣環溪詩話。何仲默詩。如玉工治玉。遇方成圭。遇圓成璧。得心應手。神授非人力也。

藝苑厄言。何仲默詩。如朝霞點水。芙蓉試風。又如西施毛嬙。毋論才藝。卻扇一顧。粉黛無色。仲默才秀於李氏。而不能如其大。故有弱調而無累句。詩體翩翩。俱在雁行。

四友齋叢說。顧東橋語客曰。何大復詩。雖則稍俊。然終是空同。多一臂力。詩藪。李以氣骨勝。何以丰神勝。學何不至。不失雕龍。學李不成。終類畫虎。

趙彥復梁園風雅。大復詩以清遠爲趣。俊逸爲宗。務在舍筏而自見神情。與獻吉分鏢異軫。各臻其極。一以爲霆驚電煜。駭目振心。一以爲落日明霞。餘暉映遠。

國史唯疑。何大復父爲渭源驛丞。太守李紀。聞丞有佳兒。召與其子同學。丞致仕歸。貧甚。具車馬。集衛官郊送之。舉酒酌丞曰。吾老友。酌大復曰。吾小友。前輩風流可慕。

李開先中麓閒居集。大復病危。屬墓文。必出空同手。時孟有涯。張崑崙。并其姪某在側。相與私議曰。自論詩失權後。絕交久矣。狀去。空同文必不來。吾輩并樊少南。戴仲鵠。亦可攬轡一空同。

四溟詩話。何仲默詩曰。元日王正月。傳呼殿晚班。千官齊鵠立。萬國候龍顏。辨色旌旗入。衝星劍佩還。聖躬無乃倦。幾欲問當關。李獻吉改爲不敢問當關。曹仲禮曰。吾舅所改。未若仲默元句。

明詩選。陳臥子曰。仲默姿制羸秀。神氣和朗。發微音。吐芳訊。令人有形穢之恥。李舒章曰。仲默才爲風始。學擅雅宗。如長江春泛。草木魚龍。咸懷鳧藻。古詩上睨子建。下拂士衡。清美合度。與李競爽。近體則初盛諸家。無所常師。意之所寓。工麗即臻。惟七言律。與獻吉同源而異流。婉佚勝之。高深不及。似稍有伯仲之分。

王士禎分甘餘話。胡元瑞論明人歌行。既尊空同。而路於大復。不知何聽琴獵圖。送徐少參津市打魚諸篇。深得少陵之體。特以秀色掩之耳。胡專舉明月帝京陋矣。

東泉詩話。信陽古體佳句。如種麻篇。孤生易憔悴。獨立多憂患。擣衣詩。君子萬里身。賤妾萬里心。詠懷詩。浮雲蔽江皋。白日忽

已晚。皆力摹六朝。

田按大復骨清神秀。龍鳳之姿。如虬髯公見太原公子。令人氣奪。與空同固是勁敵。

### 昔遊篇

三星爛夜河漢流。觴行瑟作中堂幽。李君勿嘆息。薛君且停謳。英英孟夫子。聽我當筵歌。昔遊昔遊。少年觀上都。並轡驕嘶雙紫駟。雲中十二樓。羅綺照燕州。夾槐複道臨仙苑。垂柳通闥對御溝。平明向帝宅。半醉過王侯。遊梁詞賦那稱數。入洛聲名未足儔。自言與我共聯翩。場翼甯知落九天。折花別青門。揮袂渡湘川。斑竹古魂垂淚雨。蒼梧遙夢結愁煙。南嶺越江坳。東城移海郊。不記流年幾拋擲。五見楊柳垂青梢。鴻雁散他縣。鷓鴣棲故巢。君從歧路悲轉蓬。我在長安嗟繫匏。金門上書久不報。雲閣題詩空自嘲。以茲守蹉跎。舊客罕經過。日與李薛輩。詩酒縱歡歌。春風宛轉青絲鞵。夜月流連金叵羅。筆翻翠虹霓。手掣生蛟鼉。三千豔女羅紫宮。傾城一笑揚雙蛾。星分霧散去長安。豈意天垂雲雨權。龍劍雄雌忽復合。朝天再覩漢衣冠。帝京宮觀一如昔。盤龍曲鳳青雲間。九衢車馬流如水。五侯甲第峙如山。星樞常不轉。海岳自迴環。昔日繡衣一何貴。今看竄逐宰河關。可憐舊賓友。逝者誰復還。二三壯士力搏虎。轉盼埋骨黃泉灣。榮華閃爍若電露。俛仰今古凋朱顏。君不見漢李廣。威名萬里匈奴聞。彎弓貫白石。射虎生黃雲。一朝謝病逢醉尉。灞亭不識故將軍。君不見秦范雎。折脅摺齒隨王稽。一言奪相印。七國趨關西。雄豪趙魏二公

子。徒使虞卿從魏齊。貴賤傾覆如旋風。王侯豈異鳥與蟲。魯連獨蹈滄海去。張良仍從黃石公。孟夫子。總角與君戲。共許非凡倫。萬金驟裏騰天雲。子今胡爲在風塵。低頭覩面男子身。笑予落魄亦如此。痛飲狂歌非隱淪。回首向崧岳。少室高嶙峋。寂寥紫芝曲。空負桃花春。會須約爾同歸去。爲招李薛兩才人。

施閏章螭齋詩話。往見何大復昔遊篇。五百五十五字。凡十轉皆平。近時龔中丞孝升老蕩子行。四百七十字。凡八轉皆仄。古今相望。各自一體。然宋禮部員外裴悅寄邊衣詩。二十句。凡五換皆仄韻。情致淒緊。此體不自大復始矣。

明月篇并序

僕始讀杜子七言詩歌。愛其陳事切實。布辭沈著。鄙心竊效之。以爲長篇。聖於子美矣。旣而讀漢魏以來歌詩。及唐初四子者之所爲。而反復之。則知漢魏固承三百篇之後。流風猶可徵焉。而四子者。雖工富麗。去古遠甚。至其音節。往往可歌。乃知子美辭固沈著。而調失流轉。雖成一家語。實則詩歌之變體也。夫詩本性情之發者也。其切而易見者。莫如夫婦之間。是以三百篇首乎關雎。六義首乎風。而漢魏作者。義關君臣朋友。辭必託諸夫婦。以宣鬱而達情焉。其旨遠矣。由是觀之。子美之詩。博涉世故。出於夫婦者常少。致兼雅頌。而風人之義或缺。此其調反在四子之下歟。暇日爲此篇。意調若髣髴四子。而才質猥弱。思致庸陋。故摛詞蕪紊。無復統飭。姑錄之。以俟審聲者裁割焉。

長安月。離離出海嶠。遙見層城隱半輪。漸看阿閣銜初照。澉灩黃金波。團圓白玉盤。青天流景披紅蕖。白露含輝汎紫蘭。紫蘭紅蕖西風起。九衢夾道秋如水。錦幌高騫香霧開。瑣闥斜映輕霞舉。霧沈霞落天宇開。萬戶千門月明裏。月明皎皎陌東西。柏寢岩堯望不迷。侯家臺榭光先滿。戚里笙歌影乍低。濯濯芙蓉生玉沼。娟娟楊柳覆金隄。鳳凰樓上吹簫女。蟋蟀堂中織錦妻。別有深宮閉深院。年年歲歲愁相見。金屋瑩流長信階。綺櫳燕入昭陽殿。趙女通宵侍御牀。班姬此夕悲團扇。秋來明月照金徽。榆黃沙白路透迤。征夫塞上憐行影。少婦窗前想畫眉。上林鴻雁書中恨。北地關山笛裏悲。書中笛裏空相憶。幾見盈虧淚沾臆。紅閨貌減落春華。玉門腸斷逢秋色。春華秋色遞如流。東家怨女上粧樓。流蘇帳捲初安鏡。翡翠簾開自上鈎。河邊織女期七夕。天上嫦娥奈九秋。七夕風濤還可渡。九秋霜露迴生愁。九秋七夕須臾易。盛年一去真堪惜。可憐揚彩入羅幃。可憐流素凝瑤席。未作當釭賣酒人。難邀隔座援琴客。客心對此嘆蹉跎。烏鵲南飛可奈何。江頭商婦移船待。湖上佳人挾瑟歌。此時憑闌垂玉筍。此時滅燭斂青蛾。玉筍青蛾苦緘怨。緘怨含情不能吐。麗色春妍桃李蹊。遲輝晚媚菖蒲浦。與君相思在二八。與君相期在三五。空持夜被貼鴛鴦。空持煖玉擎鸚鵡。青衫泣掩琵琶絃。銀屏忍對箜篌語。箜篌再彈月已微。穿廊入闥靄斜暉。歸心日遠大刀折。極目天涯破鏡飛。

四庫總目。景明於七言古體。深崇四傑轉韻之格。王士禛論詩絕句。乃頗不以景明爲然。其實七言肇自漢氏。率乏長篇。魏文

帝燕歌行以後始自爲音節。鮑照行路難始別成變調。繼而作者實不多逢。至永明以還。蟬聯換韻。宛轉抑揚。規模始就。故初唐以至長慶。多從其格。卽杜甫諸歌行。魚龍百變。不可端倪。而洗兵馬。高都護。驄馬行等篇。亦不廢此一體。士禎所論。以防浮豔塗飾之弊。則可。必以景明之論。足誤後人。則不免於懲羹而吹齋矣。

詩藪。仲默論歌行。允謂前人未發。然特專明一義。匪以盡概諸方。王楊四子。雖偏工流暢。而體格彌卑。變化未覩。唐人一代皆爾。何以遠過齊梁。必有李杜二公。大觀斯極。仲默集中。爲此體。僅明月。帝京。昔遊。三篇。他不盡爾。其意可窺。

明詩選。宋轅文曰。讀仲默明月篇。似欲舍少陵而宗初唐。然其於少陵深有所得。特以秀色掩之。或以爲似李東川。此其姿制流佚同耳。東川取境甚狹。仲默廣矣。雅語亦勝之。

明詩別裁。新城王阮亭論詩云。接迹風人明月篇。何郎妙悟本從天。王揚盧駱當時體。莫逐刀圭誤後賢。真不被前人瞞過。

### 玄明宮行

君不見玄明宮中滿荆棘。昔日富貴今寂寞。祠園復爲中貴取。遺構空傳孽臣作。雄模壯麗凌朝廷。遠勢連袤跨城郭。憶昨己巳年來事。秉權自倚薰天勢。朝求天子苑。暮奪功臣第。江艘海舶送花石。戚里侯門擁金幣。千人力盡萬牛死。土木功成悲此地。碧水穿池象溟渤。黃金作宮開日月。虹蜺屈曲垂三梁。蛟龍盤拏抱雙闕。城中甲第更崔嵬。親戚弟兄皆閥閱。撼里歌鐘賓客遊。排門冠劍公卿謁。生前千門與萬戶。死時不得一邱土。石家遊魂泣金谷。董相然臍嘆郟隴。宮前守衛無呵呼。真人道士三四徒。石戶蒼苔生鐵鎖。玉階碧草搖金鋪。星宮晝開見行鼠。日殿夜禱聞嘯狐。遊客潛窺翠羽帳。市子屢竊金香爐。桑田須



史變滄海。桃樹不復栽。玄都我朝中。官誰最貴。前有王振。後曹氏。正統以前不得聞。成化之間未有此。明聖雖能斷誅罰。作新未見持綱紀。天下衣冠難卽振。中原寇盜時復起。古來禍亂非偶然。國有威靈豈常恃。玄明之宮今已矣。京師土木何時止。南海猶催花石綱。西山又起金銀寺。君不見金書追奪鐵券革長安。日日迎護勅。

### 吳偉江山圖歌

吳偉老死不可見。人間畫史空嗟羨。吾觀此卷江山圖。飄然意象臨虛無。想彼濡毫拂絹素。酒酣落筆神骨露。萬里青天動海岳。空堂白日流雲霧。洲傾岸側波嶺銜。島嶼倒影翻源潭。江邊萬舸一時發。中流颯颯開風帆。崩濤湧浪勢難久。漁子舟人各回首。去雁遙知七澤中。落花誤認桃源口。煙峯蒼茫貌二叟。面髮衣冠頗麤醜。石林沙草恣點染。舒卷滄洲在吾手。憶昨弘治間。偉藝實絕倫。供奉曾逢萬乘主。招邀數過諸侯門。京師豪貴競迎致。失意往往遭呵嘖。由來能事負性氣。轆軻貧賤終其身。嗚呼吳生豈復作。身後丹青轉零落。殘山剩水片紙貴。百金購之不一得。此卷流傳天地間。我卽見汝真顏色。

田按吳偉字次翁。別號小仙。江夏人。畫山水人物。成化間待詔仁智殿。有時大醉被召。蓬首垢面。曳破阜履。中官扶掖以見。命作松風圖。偉翻墨汁。信手塗抹。左右動色。上嘆曰。真仙人筆也。居無何。放歸南都。孝宗登極。復召見便殿。命畫稱旨。賜畫狀元印。余嘗怪何李與文沈同時。而集中題畫詩不一見。惟小仙則空同。大復屢見題詠。一時好尚。不可據如此。迄今沈文畫名。高懸天壤。好事家珍藏。與五代董巨元四家媲美。而小仙畫則著錄者多。微辭。一時之名。千秋之業。固不同也。錄大復詩。附論於

此。

懷寄邊子

汝從元歲侍今皇。誰念先朝老奉常。一出雲霄空悵望。十年岐路各蒼茫。春天縹緲金莖露。晝日氤氳紫殿香。獨有揚雄尙陪從。白頭抽筆賦長楊。

葉矯然龍性堂詩話。何大復寄邊子詩。汝從元歲侍今皇。起最似李義山。上令狐相公詩。王元美最愛而屢效之。如送史僉事云。汝過崆峒劍色開。輕裘千騎擁登臺。送汝康云。汝遊桂嶺疑天盡。更入滇方覺地寬。寄仲芳云。當年汝拜尙書郎。天子宵衣問朔方。亦稍彷彿。後陳臥子寄楊伯祥一律。深得其妙云。汝從高臥豫章城。何減關西伯起名。鉅鹿風塵餘部曲。匡廬煙霧擁諸生。清時黨錮非難解。亂後音書倍欲驚。十載離居獨惆悵。滄浪東去不勝情。聲情直與信陽頴頴。

# 明詩紀事卷二

## 丁籤

### 徐禎卿十首

禎卿字昌穀。一字昌國。吳人。弘治乙丑進士。除大理寺左寺副。降國子博士。有迪功集六卷。又有歎歎、焦桐、鸚鵡、花閒、野興、自慚等集。

四庫總目。禎卿論詩宗旨。見於談藝錄。及與李夢陽第一書。如云。古詩三百。可以博其源。遺篇十九。可以約其趣。樂府雄高。可以勵其氣。離騷深永。可以裨其思。又云。繩漢之武。其流也。猶至於魏。宗晉之體。其弊不可以悉。據其所談。仍北地摹古之門徑。特夢說才雄而氣盛。故枵張其詞。禎卿慮澹而思深。故密運以意。當時不能與夢陽爭先。日久論定。亦不與夢陽俱廢。國寶新編。昌穀專門詩學。究訂體裁。上探騷雅。下括高岑。取充棟之草。刪存百一成一家之言。至今海內。奉如珪璧。

皇甫湜少玄集。詩之爲藝。獨異衆體。昌穀韻度鮮朗。情言超瑩。而原其趣。參之以神。要其構。極之以變。考則古昔。往往冥契。君之於詩。可以繼軌二晉。標冠一代。

皇甫汈司勳集。徐集獨綜菁英。莫可瑕類。非其佳穢自得。去取過嚴乎。

環溪詩話。徐迪功詩。如洞天仙子。偶落人間。不作風塵中語。

藝苑卮言。徐昌穀詩。如白雲自流。山泉冷然。殘雪在地。掩映新月。又如飛天仙人。偶遊下界。不染塵俗。昌穀自選迪功集。咸自

精美無復可憾。近皇甫氏爲刻外集。袁氏爲刻五集。卽少年所稱文章江左家家玉。煙月揚州樹樹花者。是已。不相舞陽絳灌。旣貴後。爲人稱其屠狗吹簫。以爲佳事。甯不泚頰。

王世懋藝圃擷餘。詩有必不能廢者。雖衆體未備。而獨擅一家之長。如孟浩然洸洸易盡。止以五言雋永。千載並稱。王孟明其。徐昌穀高子業乎。二君詩大不同。而皆巧於用短。徐能以高韻勝。有蟬蛻軒舉之風。高能以深情勝。有秋閨怨婦之態。更千百。年李、何、尙有廢興。二君必無絕響。

國雅徐昌穀豪縱英裁。格高調雅。馳騁於漢唐之間。婉而有味。渾而無迹。諸體高妙。都無累句可刪。

續吳先賢贊。徐昌穀初與唐寅文璧游。其詩逸麗。迨見李何制作。遂變而益邁。研極詩之變。溯其初由卿雲以來。至西京之盛。沿魏晉而下。其所攻論甚嚴。談藝之作。出鍾嶸矣。吳之文。自昌穀始變而爲六代。

王穉登晉陵集。武宗之時。文士輩出。李君亦幟於關西。徐子白眉於東海。李資弘亮。徐學精深。長才絕力。則徐不逮李。清聲古色。則李不逮徐。

明詩選。陳臥子曰。昌穀似與仲默同源。然仲默俊逸。昌穀矜貴。又自有殊。宋轅文曰。昌穀如秋夜銀河。爛爛垂地。何李刻意少陵。迪功獨宗太白。不若嘉靖時七子同境也。

王士禎居易錄。徐昌國談藝錄。未睹鈞天之美。則北里爲工。不詠關雎之亂。則桑中爲雋。當是旣見空同之後。深悔其吳歛耳。田按昌穀才力不及李何富健。而清詞逸格。矯矯出羣。不授後人指摘。良由存詩不多耳。談藝一錄。清言微旨。可儼嚴滄浪。

### 倡家詠效何遜

簾櫳秋未晚。花露夕偏佳。暗牖通新燭。虛堂聞落斂。浙浙烏棲樹。明明月墮懷。相思不可見。蘭生故繞階。

翁方綱石洲詩話。迪功五集內。未嘗無造詣處。今讀迪功集。自必以其師古者爲正矣。然如朱竹垞錄其效何遜之作云。暗牖

通新燭。虛堂聞落斂。竹垞作響落斂。本是聞字。實不可易。以音節言。對上句通字。似乎可仄。然此處用仄。則上四句純乎諧調矣。下四句浙浙奚爲而變仄。蘭生奚爲而變平耶。漁洋最善講音節。不知曾見此否。

雜謠

夫爲擄。妻爲囚。少婦出門走。道逢爺娘不敢收。東市街。西市街。黃符下。使者來。狗棘棘。雞鳴飛上屋。風吹門前草。肅肅。

明詩選陳臥子曰。此紀正德五年八月之變。

唐生將卜築桃花之塢。謀家無貲。貽書見讓。寄此解嘲。

予昔攀白日。虹蜺千紫庭。浮沈帝座側。無人知歲星。側侍公車無所歡。聊騎天馬出長安。南下滄江浮七澤。還攜謝客弄波瀾。青倪中開秀廬嶽。瀑布灑入千峯寒。冥冥仙氣貫南斗。直欲凌身燒大丹。迴裾西拂巫山浦。浩蕩歡心間雲雨。歸來欲奏楚王書。漢主上林方好武。黃金不遇心自吁。白璧無媒翻見侮。昨日結交燕少年。酣歌擊筑市中眠。正逢天子失顏色。奪俸經時無酒錢。入門百結鸚鵡盡。笑立文君明鏡前。卻思舊日高陽侶。黃公酒壚何處邊。天下綈袍誰不憐。邳卿未具山中棗。何人爲買剡溪田。唐伯虎。真俠客。十年與爾青雲交。傾心置腹無所惜。擊我劍。拂君纓。請歌鸚鵡篇。爲奏朱絲繩。胡爲擾擾蒼蠅之惡聲。我今蹭蹬尙如此。嗟爾悠悠世上名。

田按唐伯虎家吳縣城西北桃花塢。爲宋樞密章粲別業。伯虎筑桃花庵。又有夢墨亭。昌穀此歌。蓋紀其卜築之始也。昌穀又有簡伯虎詩云。麻紙功名笑浪傳。如今袖手了塵緣。交朋雲落看書札。花月蕭條問酒錢。數里青山騎犢醉。一牀黃葉擁秋眠。心期兀兀成幽病。誰與高人辦草廛。伯虎被禍後。生事寥落。賣畫糊口。余嘗謂伯虎不遇於生前。而遇於生後。毛子晉爲修墓。宋牧仲爲築才子亭。唐陶山爲築桃花仙館。詳見錄伯虎詩前。

在武昌作

洞庭葉未下。瀟湘秋欲生。高齋今夜雨。獨臥武昌城。重以桑梓念。淒其江漢情。不知天外雁。何事樂南征。

明詩選李舒章曰。八句竟不可斷。

王士禎池北偶談。徐植卿洞庭葉未下一篇。非太白不能作。千古絕調也。曹學佺亦有秦淮送別一篇云。疏籬豆花雨。遠水荻蘆煙。忽弄月中笛。欲開江上船。情致殆不減徐。徐五集中有一絕云。渺渺太湖秋水闊。扁舟搖動碧琉璃。松陵不隔東南望。楓落寒塘露酒旗。曹一絕可以相敵。新林浦云。夾岸人家映柳條。元暉遺迹草蕭蕭。曾爲一夜青山客。未得無情過板橋。

東泉詩話。徐植卿五律學孟襄陽。氣格極相似。頸聯往往不對。如故人惠思我。百里寄瑤音。獨在山中宿。松齋清道心。併以流利爲貴。不以對待爲工。又陽月隨陽鳥。遙從塞上來。北人江北望。不見隴頭梅。四句遙對。又今來寒食節。獨望瀟陵園。高齋今夜雨。獨臥武昌城。二篇句法相似。可悟活法。

擬古宮詞六首

君王無事日臨戎。韎韐親調白玉弓。千騎紅袍齊扈蹕。臂鷹遙出建章宮。

上場搏戲未言回。魚鑰重重向暮開。遙聽雲中催羯鼓。君王何處打毬來。

劍舞戎歌樂未休。煌煌芝火五城樓。班姬獨臥朝陽殿。卻捲珠簾望女牛。  
興慶池頭漏未闌。梨園子弟曲將殘。花前更進涼州伎。無那西宮月色寒。  
馳道毵毵御柳垂。春風挾彈羽林兒。武皇親御長楊殿。勅與龍駒控鬣騎。  
狗監離宮承宴歡。掖庭通晚不迴鑾。那能夜夜長門裏。銀燭薰衣待漏殘。

田按昌穀擬古宮詞。爲康陵作也。康陵始寵劉瑾。繼嬖江彬。錢甯。花幄豹房。盤遊無度。九門黃店。中禁團營。威武自號將軍。塞門或稱家裏。轍周天下。遂並駕於穆王。我夢江都不獨歌於隋帝。雜史所陳。更僕難數。雖荒於臨御。而藻艷詞章。今採當時詩歌。備列於此。李夢陽聖節聞駕出塞云。千官北首望龍旂。萬國車書集鳳闈。八駿穆王秋色遠。幾時親擁白狼歸。何景明諸將入朝歌云。河北諸軍盡有名。雲中驍騎本輕生。金裝白馬翩翩出。不見長安子弟兵。闕下千官侍鳳樓。苑中天子建龍旂。豹房虎圈先班賞。武帳前邊賜姓侯。邊貢雲中曲云。六軍歌舞健長征。五色雲隨九仞旌。傳語胡兒休近塞。太平天子駐平城。又迎樂曲云。石頭城如銀虎踞。金陵山似玉龍蟠。休訝六軍停蹕久。本來江左是長安。自采民風問老農。微行不遣近官從。那知天子關天象。到處雲成五色龍。弓如滿月向江開。箭插寒潮捲浪迴。水上鼉鼉莫深避。我皇元爲射蛟來。潮落江門煙水秋。雲帆八月過揚州。兩京馳道三千里。夾岸垂楊接御溝。王廷相行邊詩云。長風吹雪暗胡天。凍合胡兒飲馬泉。漢帝如今新好武。左賢營部莫臨邊。絳幘緋袍雲滿衣。紫駟銜韉疾如飛。三年榆塞無烽火。學會唐王大打圍。薛蕙皇帝行幸南京歌云。天風吹動翠雲裘。坐看樓船下石頭。江左重瞻天子氣。金陵長作帝王州。燕姬玉袖抱箜篌。馬上長隨翠輦遊。春來照影秦淮水。愛殺江南雲母舟。淮水南邊是狹邪。蛾眉臨水折江花。日暮龍舟泊何處。玉牀拋在五侯家。三月金陵鶯亂囀。江邊桃葉映春隄。不是行宮淹北土。金陵花月使人迷。黃佐凱歌詞云。孝陵松柏貼青霄。鳳輦龍旗久寂寥。百歲遺黎應感嘆。神孫英武似先朝。錦韞白馬出新河。簇隊吳娃善凱歌。譜得昇平新樂府。內家休按舊雲和。朱應登皇帝南巡歌云。京觀高築石頭城。大旆雙懸日月

明西內舊誇提督府。南都今有外家營。擬古宮中行樂詞云。嘯蛾度曲譜涼州。轉盼承恩並紫驄。佳麗不須燕趙產。才人新上大長秋。擬古巡幸詞云。張灣灤縣總離宮。衣宿民間似禁中。莫遣逸熊攀檻入。曾聞複道與天通。鄭善夫羽獵謠云。君王自擁鸞羆裘。獵騎翩翩盡貴遊。歸來錫宴傳封拜。狗監雞坊十二侯。燕京詩云。緋衣紫甲入東華。羯鼓饒歌散御花。邊士盡騎天廐馬。燕姬翻泣五雲車。顧璘武皇南巡舊京歌云。白髮梨園老樂師。錦臂花帽對彈絲。行宮只奏中和調。解厭南朝玉樹詞。六代繁華何足誇。而今四海共爲家。暫看吳苑環城水。終憶燕臺夾路花。游潛都下春遊云。臺殿玲瓏隔綵霞。御溝晴日亂鳴蛙。樓前走馬無人問。小袖黃衫外四家。大駕南遊云。趨陪日日四家軍。走馬飛鷹策上勳。虎豹絲彈胡旋舞。夜深張宴鬪鷓鴣。楊慎南狩曲云。入塞旌旗盡魯家。臨關鼓吹擁皇華。西迎漢使千金囊。北送胡姬百兩車。法駕旋歸隔歲年。傾城奔走徧華顛。教坊新奏回鑾曲。光祿先開下馬筵。韓邦靖聖上西巡歌云。宮車七月度居庸。天子巡邊御六龍。胡虜遠藏三萬里。卻鳴金鼓下雲中。聖皇神武自天成。遊擊兵威舊有名。一騎獨馳三百里。日斜同上廣洋城。頓銳西巡曲云。龍顏日表映龍城。青海灣西太白明。前陣鼓旂淩夜雪。後車弦管變冬晴。孫繼芳北征還朝凱歌云。牙旗寶蓋耀星文。倚鹿牽羊總百羣。二十四通催羯鼓。帳前齊賀大將軍。王謳塞上云。角弓羽箭射黃羊。胡馬年來獵上陽。可惜總戎非衛霍。徒令威武自君王。王世貞正德宮詞云。蜀馬分棚對打毬。織腰帖地澆青油。金牌銀盃從渠愛。誰敢爭先第一籌。僊韶別院奏新聲。不按唐山曲裏名。青鷄白翎俱入破。十三絃底似雷鳴。金鰲橋畔柳絲長。舴艋船頭有柘黃。六院少兒初病酒。御前親自過魚湯。窄衫盤鳳稱身裁。玉靶雕弓月樣開。紅粉別依回鶻隊。君王新自虎城來。夜半毬燈出未央。俄傳鞞鐸向平陽。六宮處處秋如水。不獨長門玉漏長。

邊貢三十七首

貢字廷實。歷城人。弘治丙辰進士。授太常博士。擢戶科給事中。改太常丞。出知衛輝府。改荊州。歷山西、河南、提學副使。召拜南太常少卿。遷太僕卿。改太常卿。提督四夷館。進刑部侍郎。戶部尙書。



有華泉集十四卷。

四庫總目。賁詩才力雄健。不及李夢陽。何景明。善於用長。意境清遠。不及徐禎卿。薛蕙。善於用短。而夷猶於諸人之間。無憑陵一世之名。而日久論定。亦不受世人之排擊。昔薛蕙於嚴嵩爲同年。頗相倡和。及嵩柄國。蕙卽謝絕往還。併削去舊作。不留一字。是集乃以送嵩之作。列爲壓卷。不免見疑於清議。然詩集爲賁沒後。其里人劉天民所編。時當嘉靖戊戌。正嵩熾盛之日。或天民無識。趨附時局。非賁本志歟。

朱觀。海嶽靈秀集。華泉之作。雖不逮李。何。然平淡和粹。孝廟以前。海嶽之才。無其倫比。

四友齋叢說。世人獨推何。李。爲當代第一。余以爲空同關中人。氣稍過勁。未免失之怒張。大復之俊節亮語。出於天性。亦自難到。但工於言句。而乏意外之趣。獨邊華泉與象飄逸。而語亦清圓。故當共推此人。

藝苑卮言。邊廷實詩。如洛陽名園。處處綺卉。不必盡稱姚魏。又如五陵裘馬。千金少年。

詩藪。弘正並推邊。何。徐。李。每怪邊品第懸遠。胡得此稱。及讀獻吉送昌穀詩。是時少年誰最文。太常邊丞何舍人。仲默贈君采。亦有十年深落失。李之句。則李何於邊。正自不淺。余細閱當時諸家。若仲冕。德涵。敬夫。子衡。詩皆非長。華玉。繼之。升之。士選。輩。或調正格卑。或格高調僻。獨邊視諸人。差爲諧合。不得不爾。明詩選。陳臥子曰。廷實粗率未除。然時見精詣。五言尤稱長城。宋轅文曰。尙書才情甚富。故能於沈穩處見其流麗。聲價在昌穀之下。

國雅。邊司徒集中。如綠水閭門道。青山建業城。地入河源渺。天連塞日曛。又魯連箭滅遺書在。微子城荒故堞留。千盤鳥道懸雲上。五色龍江抱日流。應是豪華語。

明詩別裁。華泉邊幅較狹。而風人遺韻。故自不乏。李。何。邊。徐。並名。有以也。

田按華泉集。蕙蔓未翦。今觀阮亭詩選。頓爾改觀。曹子建常嘆異世相知。誰訂吾文者。阮亭真華泉曠世知己。華泉古詩佳作。

不及何李之多。律體翩翩。自是風流。一代人豪。竹垞專取五絕。未爲知言。

次何遜落日泛江贈魚司馬之作送劉美之

相投已盍簪。相贈還留帶。昨暮長安西。今朝苑城外。誰言車馬地。復得須臾會。會君心暫悅。去君心轉切。秋岐蔓寒草。隱隱烟不絕。歸雁影聯翩。墜葉聲騷屑。端居尙興感。況乃萬里別。桂舸泝江湖。何時到蠻泖。蠻水夜悠悠。月明登郡樓。幽蘭翠縈渚。紫蘅香滿洲。應歌楚人調。坐惜勛名浮。

戲簡王臨安同年

候子虎溪渡。送子龍陂橋。出城不相見。征蓋倏已遙。百金買江魚。千金買春酒。期子會宜城。飄忽過潼口。追子漢江曲。望子峴山頭。子有室家好。豈知途路愁。暮投城外寺。急雨響高屋。安得與子同。長歌對明燭。子程忽早發。吾駕亦早留。風塵莽南北。一別動經秋。

題楊氏所藏畫

翩翩水禽飛。灼灼水花亂。柔豔雜幽聲。紛紛滿芳甸。悠悠畫中意。潑潑天機新。彷彿曾遊處。江南二月春。

贈尙子

意氣憑陵一當百。關西儒生五陵客。少年學書復學劍。老大蹉跎雙鬢白。門下諸生半賜麻。閨中小婦猶炊麥。布衣東來謁天子。春日醉臥長安陌。陌頭花絮夕紛紛。瓊閣如天隔紫雲。浩歌翩然卻歸去。眼底誰

是平原君。

分題得鵲山湖送維正李憲副之山東

齊門東。沙徑平。雲幕幕。湖冥冥。使君來。麥秋晚。柳陰陰。畫舟遠。瘦蒲疏。荇逗遛。香南浦。煙光接西堰。堰北山。靈鳥聚。對面潺湲華不注。山前綠稼隱茅茨。舊是齊儂釣遊處。橫橈越水滸。飛踏青芙蓉。華陽洞口跨白鹿。醉吹玉笛呼眠龍。長鑷野老逐李邕。錦袍仙人隨赤松。石壁土花秋靡靡。古蹤悠然鎮如此。要留洒翰洗蛙蟬。雨林夜黑唬山鬼。

題金谷園圖賦得綠珠怨

誰言妾命薄。結髮承主恩。誰謂妾身輕。寵冠金谷園。園中桃李千萬樹。對妾妍華避無處。徘徊歌舞曲未終。門外戰鼓聲逢逢。當時只倚紅顏貴。豈料紅顏爲主累。主家高樓天與齊。妾身不惜委黃泥。他生願作銜泥燕。長傍樓中梁棟棲。

題石田畫

平生不知石田子。往往相逢畫圖裏。世傳百本無一真。抹青塗紫俱門人。秋堂對此雙眼豁。倏然置我溪與壑。君不聞畫家貴意不貴工。只在冥冥漠漠中。

贈張氏汝吉汝誠兄弟

魯川何迢迢。太行亦蒼蒼。行人躍馬出門去。何異飛鶴東西翔。愛君此行飲君酒。君家兄弟古無有。夕郎清迴鵬鶚姿。秋曹盤礴雷霆手。朝論同歸攬轡年。家聲況是埋輪後。青春衣繡下中臺。山東山西花欲開。休嗟羽翼經年別。早喜陽和及草萊。

送顧華玉分體得三五七言

送歸客。送歸客。東城復西苑。碧草萋萋別路長。蒼山歷歷愁心遠。愁心遠。征駕不可留。去年送歸陌上雪。今年送歸江上秋。江上秋。江雨霽。返照入林光翳翳。家在齊川未得歸。年年送客來沙際。送歸客。請客聽我歌。我如水中鳧。君如江上波。波流去不息。鳧飛無遠翼。迴繞轉岸君已遙。薄暮徘徊此何極。

過壽陵故址

玉體今何所。遺墟夕靄凝。寶衣銷野燐。碧瓦蔓溝藤。成戾崩年諡。恭仁葬後稱。千秋同一毀。不獨漢唐陵。

田按壽陵景帝臨馭時所建。英宗復辟。帝崩於西宮。諡曰戾。毀壽陵。以親王禮葬金山。成化十一年。詔諡曰恭仁。康定景皇帝。毛西河云。西山有景帝墳。傾圮不堪。人呼廢墳。康熙中。聖祖見之愴然。爲置守陵尉。與諸陵等。

望陵

憶在先朝日。曾沾侍從恩。鸞輿歸寂寞。鳳質儼生存。夕日低阡樹。春風長澗蘩。祠官如可乞。長奉泰陵園。

重陽後三日登雨花臺

一片金陵月。荒臺對酒看。水雲霏冉冉。江日隱團團。雁早那堪聽。花遲未可殮。凭軒望鄉國。西北近長安。

懷昌穀大理

孺子南州彥。詞華早擅場。共憐廷尉府。祇益簿書忙。寶鏃愁鸚鵡。鹽車困驢驢。何時一艇去。與爾泛滄浪。

寫懷

欲逃中夏暑。暫止上江船。夜臥對江月。曉行披水烟。佳期渺天末。良覲阻尊前。相問各華髮。遙悲青鏡年。

夜泊漢陽卻望武昌有懷矩菴

贈別

對岸武昌郭。清宵迴望頻。離心繫舟遠。旅夢涉江新。積水明疑晝。浮烟靄似春。樓空黃鶴杳。延佇獨勞神。

別伯玉

獨持文字印。遙泛木蘭舟。古驛尋京口。寒城過石頭。誦聲分館夜。吟思捲簾秋。欲問前朝迹。青山是蔣州。

趙御史坐留別

君行不相見。臥病對春風。世事浮沈外。交親感慨中。古臺燕郭暮。流水晉祠空。他日歌招隱。青山有桂叢。

人日懷白巖侍郎

聽雨罷彈棋。蒼茫生遠思。遙應白門柳。飄蕩綠煙絲。旅迹江花笑。歸心海燕知。倚酣方戀別。休誦渭城詩。

去年人日題詩處。鄭氏茅堂人可憐。出谷早鶯嗁恰恰。韻風寒竹倚娟娟。隨鑾并入青雲上。解珮同歸素月前。此日寂寥驚旅食。坐看亭雪撫流年。

寒食郊行

來家曠前春可憐。空山遲日起晴煙。柳枝嫋嫋翠猶弱。花蕊菲菲紅且妍。荒隴歲時還俎豆。短牆兒女正鞦韆。當年竹馬歡遊地。華髮經過思惘然。

元旦次趙類菴宗伯韻

歲首江南久客身。宦情寥落道情深。極知佳麗非吾土。且喜逢迎有故人。城上雪痕經臘在。水邊梅蕊覩年新。呼童早蠟登山屐。莫負陶家漉酒巾。

次韻留別諸友

荆鄂相望一水間。早秋為別仲秋還。乾坤去住真如寄。車馬馳驅不暫閒。白帝城頭烽火急。黃牛峽裏戰旗殷。江陵舊是咽喉地。蜀道東來第一關。

送郝御史謫溫州

萬松深護理官衙。嵐翠陰中閱歲華。策馬暫拋臺府印。登樓常眺海門霞。六朝秀句憐康樂。四海名山說永嘉。落落曉星雲霧裏。斗牛何日轉仙槎。

登鳳凰臺次太白韻呈同遊諸公

苑中芳草玉珂遊。苑外白雲晴日流。多病未能拋短杖。有懷翻怯上高邱。垂楊晚映秦淮水。杜若春生謝朓洲。靈鳥不來阿閣迴。酒闌空抱古今愁。

元世祖廟

斷碑深倚廟門斜。往事傷心付一嗟。春草平沙仍牧馬。晚風疏樹偶棲鴉。唐陵漢寢雖無主。北幕南庭自有家。欲弔魯連何處所。飛塵如雨亂鳴蛙。

謁文山祠

丞相英靈迴未消。絳帷燈火颯寒飈。黃冠月日胡雲斷。碧血山河龍馭遙。花外子規燕市月。水邊精衛浙江潮。祠堂亦有西湖樹。不遣南枝向北朝。

明詩別裁後半神到弔信國詩此爲第一起句及三四臥子改本。

宴鄭氏園亭二首

未須韋杜家家到。一出城門便不同。折簡敢爲難致客。披襟先受不訾風。中年畏病長辭酒。他日重遊定作翁。聞有袁家紫開遍。尙餘春色繞芳叢。

觸熱遙遙一駐驂。望中煙火傍山嵐。春回花徑殘紅少。雨過林亭遠翠涵。此日圖書還客邸。故人尊俎又

城南冰壺涼簟留連地。時聽黃鸝聲兩三。

登嶽次劉希尹韻

北上天門日未斜。剛風吹我度谿笏。仙人洞古留丹鼎。玉女祠高拱碧霞。深澗千年猶凍雪。陰崖四月始桃花。秦封漢禪俱牢落。細讀穹碑感歲華。

題畫二首

經旬不出戶。忘卻城南道。江亭細雨過。一夜生春草。琴罷興不盡。起登江上臺。江空秋萬里。不見一舟來。

無題

庭際何所有。有萱復有芋。自聞秋雨聲。不種芭蕉樹。

靜志居詩話。杜牧之一夜不眠孤客耳。主人窗外有芭蕉。呂居仁詩。如何今夜雨。只是滴芭蕉。張安國詞。點點不離楊柳外。聲只在芭蕉裏。無名子詞。窗外芭蕉窗裏人。分明葉上心頭滴。古之愁夜雨者。多以蕉葉爲辭。高荷大芋。非所憎也。王元美謂廷實。芭蕉不可言樹。然維摩結經云。是身如芭蕉樹。而不堅固。是芭蕉未始不可名樹。元美之言過矣。

秋日過西內團殿

御溝東畔古松盤。曾得先皇倚笑看。龍馭不歸鸞吹杳。石廊圓殿鎮秋寒。



題扇寄希尹壽春

淮南花雨送春還。叢桂陰陰郡閣閒。自是劉安有仙骨。謫居猶近八公山。

大堤

大堤女兒花見羞。大堤楊柳映青樓。金壺滿注樊城酒。醉殺狂夫不解愁。

題天鵝海青圖

雲暗胡天雪滿衣。駕鵝聲亂海青飛。李陵臺下陰山北。正是單于夜打圍。

草場

牧馬場邊苜蓿香。回龍宮外樹蒼蒼。當年駿骨今何處。曾被金鞍侍武皇。



# 明詩紀事卷三

## 丁籤

王廷相二十四首

廷相字子衡。儀封人。弘治壬戌進士。選庶吉士。改兵科給事中。以言事謫判亳州。改高淳知縣。召爲御史。巡按陝西。被誣下獄。謫贛榆丞。遷甯國同知。歷四川僉事。山東提學副使。右布政使。遷右副都御史。巡撫四川。入爲兵部侍郎。遷南兵部尙書。召拜右都御史。加兵部尙書。提督團營。仍掌院事。加太子少保。進太子太保。坐事斥爲民卒。隆慶初復官。贈少保。諡肅敏。有家藏集五十六卷。內臺集七卷。

藝苑卮言。王子衡詩如外國人投唐。武將坐禪。威儀解悟中。不免露抗浪本色。

國史唯疑。王廷相南昌行云。白洲老子中臺長。何用文章諛新莽。白洲李士實也。士實既叛被執。見伍文定不跪。伍怒撻之二十。創死。年踰七十矣。昔人嘲夏貴詩。何不六十九乎。

明詩選。陳臥子曰。子衡五古。有沈鬱之思。壯麗之色。李舒章曰。當何李時。長於五言古者。有子衡。君采。子衡峻麗。得其雄分。君采雋潔。得其英分。

靜志居詩話。浚川詩格。諸體稍稱。惟五言絕句。頗有摩詰風致。下亦不失為裴十秀才。崔五員外。田按子衡刻意學詩。麤漫之篇。誠如昔人所譏。遇有合作。如遊五都市中。動獲奇寶。

赭袍將軍謠

萬壽山前播大鼓。赭袍將軍號威武。三邊健兒猛如虎。左提戈。右跨弩。外廷言之赭袍怒。牙旗閃閃軍門開。紫雲罩甲如雲排。大同來。宣府來。

東泉詩話。王子衡赭袍將軍謠。甚古質。與李空同內教場歌。意致相同。李詩不明斥。赭袍尤極含蓄。

四友歎錄二

獻吉迹轉晦。幽求日深造。禮樂百年餘。詞苑見古調。補袞燁藻火。敦彝薦郊廟。如何夷門下。弄月自長嘯。

李員外  
夢陽

修撰冲靜士。倏然類緇羽。恥謁北司廬。先幾竟遐舉。一邱悅性靈。萬鍾乃土苴。誰當薦陽綰。大道儵九轍。

何修  
撰塘

別後再贈德涵

浮嵐冒晴巘。驚風振華林。枉節回峻坂。高興出遙岑。層邱既窈窕。鬱木亦蕭森。君子薦芳酌。晤言開素襟。憂時富危論。探道生遐心。悲帝蒼梧遙。弔屈湘水深。嗟予秉幽尚。及茲成滯淫。徒擬孫公嘯。猶帶鍾生音。

事變靡常塗達機古所欽。陶令恥折腰。三嘆歸來吟。栖栖茲倦遊。邈矣行抽簪。

西山道院二首

西山玄隱林。登攀今偶爾。澄澄蘿月上。颺颺松風起。冷然絕塵想。道悟從茲始。橫琴聊一揮。吾志在山水。  
仙臺俯靈渚。一一生華春。屏氛坐幽館。逍遙含清真。今人苦多事。百欲奉一身。邈哉河上公。此道誰能陳。

遊龍洞

陽阿春已暢。百卉青不淺。官牒憚煩督。素悰期野展。祇林才一舍。幽深劇百轉。雙闕對面峙。峭壁自天斷。  
豹蹲穴霧腥。龍臥洞雲懶。春賞旣勝地。朋來況文選。促工徵清歌。攀岑恣幽覽。張弛合道符。茲遊詎流湏。  
遠追蘇門嘯。竊附緱山管。曠士自殊調。今人苦多辯。

發泗安暮泊湖州

山行苦登陟。水涉意自洽。南巒一雨瀉。北湖千漲納。岑岑帆初揚。瀏瀏風愈颯。蓮歌夾浦聞。漁唱隔煙答。  
搖裔順流潮。隱見依城郭。雲霞暮生變。鳧鷖晚成匝。蘊靈茲土勝。探幽予心合。延佇湖上瀨。杳然憶茗雪。

明月沱

客行無次序。向夕舟復維。豈不厭水宿。搖裔渺前期。沱明星月上。江冷蛟龍移。野鼓何填填。宵火亦離離。  
牛渚暮猿吟。湘潭傷楚辭。我行方浩然。我懷亦遠而。流浪自古昔。慨嘆及今茲。驚鵲靡定所。荒雞詎知時。

行藏隨去住。明發良不遲。

秋水嘆

潛沔之區田弈弈。古來恐是雲夢澤。江高地卑視益盎。一蟻穴堤水爲國。豆莢穀穗熟半強。造次豈得禾登場。賈客乘流汎大舸。農夫日暮啼空牆。

別劉尹良貴

與子意不淺。襟期忽此違。江湖一相送。鷓鴣各分飛。世難幾時淨。宦情今已微。那堪值搖落。風露入秋衣。

答邊子對雨見懷韻

鍾山靈雲度海色。晨雨彌天晡未休。南隣垂柳有餘翠。北沼新荷無數浮。懷人宛在水中沚。眺遠已孤江上樓。忽枉佳章慰岑寂。無煩揮屏強銷憂。

漢上歌

悽斷羊公石。多年臥草萊。今人不墮淚。古字日生苔。

江南曲

儂是江南兒。慣作江南樂。黃金裝箜篌。白玉爲捍撥。

閩中雜詠

片舫連雙槳。嘔啞雜哩囉。慣聽吳權曲。羞殺閩中歌。

秋興

片月上東方。照我水西閣。相對可憐影。蕩漾不能掇。

采菱曲

蘭舟夾畫漿。素腕玉雙回。蕩入南湖去。菱波一道開。

江南春思二首

過卻清明穀雨。開遍梨花杏花。眼看青春強半。王孫依舊天涯。落花闌闌隨水。芳草萋萋掩們。誰道江南春色。能禁風雨黃昏。

烏棲曲

垂柳風清絲宛宛。碧梧霜冷子離離。阿誰轆轤汲金井。驚起雙烏月裏飛。

蕪城歌

莫向隋宮問六朝。璠姬玉蕊已煙銷。祇今惟有湖邊柳。猶對春風學舞腰。

巴人竹枝歌

郎在荆門妾在家。年年江上望歸查。茶蘼種得高如妾。縱有春風枉卻花。

郎上瞿唐儂自愁。生憎風水打船頭。江靈若解渠儂意。郎若來時水不流。

徐氏東園歌

箏絲十四鳳凰鳴。彈盡南聲與北聲。一曲伊州剛入破。梁園詞客不勝情。

朱應登七首

應登字升之。寶應人。弘治己未進士。除南戶部主事。遷延平知府。擢陝西按察副使。改雲南。遷布政司右參政。有凌谿集十七卷。

藝苑卮言。朱升之詩。如桓宣武。似劉司空。無所不恨。

國雅。升之情過其才。亦時出新語。其函谷關歌。全効高常侍。稍有蹇礙。麤處對雪有風急。仍含雨。天低欲墮雲。殆佳句也。田按。升之儻名十子。究其才品。在子衡之下。康王之上。

春山逸興圖

達人無俗情。愛此邱壑美。沈默寡所營。日夕成徙倚。春和林木潤。雨霽氛埃止。負杖出遠郊。行歌向清泚。大觀契物情。幽賞洞玄理。晦明雲變樹。靜激風行水。寄興聊據梧。忘言時隱几。或考在澗槃。亦洗臨河耳。市喧旣罕聞。朝籍將安齒。以茲濩落心。終老匹黃綺。

六盤山



西北六盤山切雲。一盤一折象天文。穿林列騎交愁入。嘯壁哀猿近厭聞。隴樹遙連邊塞盡。秦關中斷渭流分。清秋忽報烽煙靜。落日猶過虎豹羣。

鳳縣道中

山下條梅動早春。山腰棧閣倍愁人。江流滾滾西通蜀。斜谷嶢嶢北控秦。物色向陽猶掩藹。客心隨馬共逡巡。羊腸鳥道開天險。騁望臨高發興新。

晚次盈口口號

盈口人家聚落成。驛亭臨水有餘清。寵光山色丹楓麗。點綴江痕白石明。估客暗依殘火宿。漁舟習傍急湍行。蓴鱸萬里虛乘興。蝦菜一殮聊繫情。

滇中懷歸

連巖望不極。唯見鳥飛還。鄉心落何處。日沒禺同山。

沿途詠懷二首

螭頭噴沫響水谷。虹影垂河隄澗亭。交割雄州春樹色。蚤緣滇海幕山青。風前洱水白泱泱。雲裏蒼山晚更蒼。六詔只今歸一統。殘碑猶說段平章。

康海九首

海字德涵。武功人。弘治壬戌第一。人及第。授修撰。以救李夢陽。坐劉瑾黨。落職爲民。有對山集四十四卷。

四庫總目。海以救李夢陽故。失身劉瑾。瑾敗坐廢。遂放浪自恣。徵歌選妓。於文章不復精思。詩尤頹縱。

藝苑卮言。康德涵詩。如靖康中宰相。非不處貴。恒擾簷率。無大處分。德涵既罷官。居鄆杜葛巾野服。自隱聲酒。時有楊侍郎庭儀者。少師介夫弟。以使事北上。過康。康故契分不薄。大喜置酒至醉。自彈琵琶。唱新詞爲壽。楊徐謂家兄居恆相念。君但得一書。吾爲道地史局。語未畢。康大怒罵。若伶人我耶。手琵琶擊之。格胡床迸碎。楊踉蹌走免。康遂入口咄咄。蜀子更不相見。

靜志居詩話。德涵坐控獻吉。遂挂清議。歸田之後。耽心詞曲。其小令云。真箇是不精不細醜行藏。怪不得沒頭沒腦受災殃。從今後花底朝朝醉。人間事事忘。剛方。後落了膺和滂。荒唐周旋了籍與康。論者原其心而悲之。沒時家無長物。腰鼓多至三百副。留心風雅之日少。宜其所就止此爾。

田按對山救空同。豪氣蓋世。固是一時俊人。惜詩文不副盛名耳。嵩陽雜識云。空同與韓貫道草疏。劉瑾切齒。必欲置之死。賴康對山營救而脫。後對山得罪。空同議論稍過嚴。人作中山狼傳以詆之。考中山狼傳。故城馬中錫作。王敬夫漢陂集。亦有中山狼院本。論者疑對山以空同坐累。空同特未營救之耳。未嘗逞凶反噬。如傳所云云也。疑別有所指。余檢對山集。有讀中山狼傳詩云。平生愛物未籌量。那計當時救此狼。笑我救狼狼噬我。物情人意各無妨。固無庸以後人疑竇爲空同解釋矣。

與呂子發潯西

蒼雲爛白日長。並轡遊辭曲房。君去不來我心傷。山寂寂。闕無侶。愁檢故詩歷孤嶼。孤嶼亭亭當大河。下有萬尺之洪波。洪波萬尺有時盡。此意悠悠君若何。

短歌行

青樓下。欄垂楊道。紅粧結伴尋芳草。修眉照月翠雙彎。杏撥琵琶笑春早。五陵年少賤黃金。一聽嬌歌意便深。千金願買芙蓉幕。不願千金願一心。須臾樂盡夜窗白。歡去悲生心脈脈。人生拘束朱顏飛。翻羨幽州胡馬客。

望龍池懷汝濟吏部

小殿俯芳林。丹臺挹翠岑。重來慰好興。孤眺愜春心。時序關華髮。邱園愛短吟。如何韓吏部。已放二毛侵。

卽事

夕日登臨雨乍晴。水光山色亦縱橫。何須梵伎調銀甲。自有仙人吹玉笙。萬里相思無雁至。一年蕭瑟有詩成。東籬又報黃花發。悵望空堂蟋蟀鳴。

得伯循書將以十月見訪

葡萄釀作酒。復置琉璃杯。共君宛轉歌。一日三萬回。

扶風道中

鳳泉東是美陽城。秦后離宮跡已平。細草不知龍輦去。城邊日日喚愁生。

和岐東澣西夜歸之作

汴上行吟月下歸。露花涼透薜蘿衣。風流一似蘇門畫。直欠當年阮少微。

豔詞

杏撥朱弦舞袖長。楊花默默杏花香。幾時逐得春遊隊。爛向東風醉海棠。

二月九日同德充德一杏花亭集

醉後題詩滿四牆。感時乘興亦非狂。年年花發年年醉。更乞天公六萬場。

王九思九首

九思字敬夫。鄆人。弘治丙辰進士。選庶吉士。授檢討。改吏部主事。歷郎中。坐劉瑾黨。降壽州同知。尋勒致仕。有漢陂集十六卷。續集三卷。

藝苑卮言。王敬夫詩。如漢武求仙。欲根正染。時復遇之。終非實境。敬夫名位少。至對山。而才情勝之。倡和章詞。流布人間。遂爲關西風流領袖。

國史唯疑王九思遊春記。或譏之云。內李林甫擬長沙。楊國忠擬新都。賈婆婆擬臨穎。當國懼甚。王實寓意於此。時處分逆黨。獨待對山漢陂過。嚴宜無以服其心。

國雅。王敬夫才雋思逸。銳於綺麗。譬之湖外碧草。海東紅雲。流彩奪目。其五言如雲壓嶺頭樹。草連煙際村。金馬當朝彥。銀魚隔歲焚。山雲晴見楚。煙樹遠浮秦。飛鳥三峯外。孤城落照前。七言如天外行雲難入夢。手中團扇易驚秋。直造盛唐佳境。

田按劉瑾請建義勇武安王廟。於陝西興平縣馬嵬鎮。仍乞頒敕防護立碑。碑文李茶陵筆也。王敬夫馬嵬廟詩云。秋風落

日馬嵬道南廢廟顏色新。立馬踟躕問野叟。野叟須臾難具陳。請予下馬坐樹底。展轉欲語還悲辛。正德丙丁戊己年。寺人氣燄上薰天。寺人原是馬嵬人。大築棟宇求福田。馬嵬鎮裏東嶽祠。一時結構何參差。瀆神媚鬼意未休。浸淫及漢壽亭侯。占民吠畝不與直。費出帑藏多蝨賊。工徒淋漓血滿膚。晝夜無能片時息。東樓西觀對南山。巍巍新廟成何棘。翩翩羽客招呼至。考鐘擊鼓空坐食。更有文章頌功德。穹碑大書爲深刻。我本田家孟諸野。但認犁耙字不識。往往才士過吟哦。盡道台臣與秉筆。聽來依稀記姓李。云是文章名第一。豪華轉眼不足恃。乾坤變化風雷異。寺人已作檻中囚。道路忽傳邸報至。當日台臣尙秉鈞。寄語縣官碑可措。橫曳碎擊亟掩藏。至今文石埋郊藪。予聞野叟言。坐來生感激。赫赫台臣苟如此。寺人微細何嗟及。月明騎馬陟前岡。仰天一笑秋空碧。茶陵於康德涵。王敬夫爲館師。德涵喪母。人謂銘表碑傳。必求當時鉅公。德涵曰。傳其親者在文章耳。官爵爲何。自述狀徧送諸公。德涵又與李空同。倡爲文必秦漢。詩必漢魏。盛唐之說。詆茶陵爲靡弱。由是茶陵益憾康生。及逆瑾誅。德涵坐落職。敬夫亦牽連降免。德涵以救空同得大名。又坐事彰著。敬夫因事波及於茶陵。不能無深望。感事詩云。中林有巨鳥。自矜毛羽貴。一朝振翮飛。忽與飄風會。展轉萬餘里。下息丹山背。棲止青桐柯。渴飲醴泉瀨。久假不自知。殊非鸞鷲類。又漫興絕句云。不有李康持藻鑑。豪傑爭趨懷麓堂。又答王德徵書云。自歸里舍。有所述作。擬爲傳奇。紆情暢志。不意親朋指摘瑕類。投諸館閣。發怒起禍。幸以消阻。蓋指遊春記事也。敬夫於樂府爲當家。詩亦富有才情。惜質地麓漫。未盡脫秦聲耳。

### 對山草堂宴集

對客輒弄笛。平生桓叔夏。花時攜妓遊。豈讓東山謝。滿谿花正香。何必黃四孃。雪兒歌楊柳。花奴行玉觴。斜陽挂遠樹。勿用傷遲暮。不見平津侯。一朝起徒步。漢殿影娥池。吳宮香水溪。昔人那可見。唯有烏夜啼。

聞盜賊且至登壽州城樓野望示避盜諸君子

寇盜東南近。吾生去住難。舉頭惟見日。何處是長安。野迴愁多壘。樓高獨倚闌。佩刀逢郡叟。垂涕說凋殘。

潯西莊春日行樂詞五首

繞屋花堆繡。當筵酒似油。青童珠絡臂。紅伎錦纏頭。深院歌嬌鳥。垂楊繫紫驄。謝公行樂地。不羨五陵遊。  
裊裊鳴仙珮。盈盈出洞房。盤雲高髻子。疊雪繡羅裳。倚柱調鸚鵡。吹簫引鳳凰。煙花春日暮。沈醉紫霞觴。  
渭北神仙府。春來樂事多。花枝侵舞榭。日色豔宮羅。麗曲嬌鶯妬。紅顏細馬馱。更憐明月上。流影入金波。  
十二層樓外。和風醉牡丹。紫雲臨綺席。朱袖倚雕闌。嬌燕含羞語。名花帶笑看。歡悰猶未厭。天際駐青鸞。  
金馬當朝彥。銀魚隔歲焚。高樓丹鳳麓。閑臥碧山雲。湘瑟春風度。秦箏月夜聞。太平無一事。只合醉朝暉。

本事詩。蒙叟曰。敬夫與德涵。放逐鄆杜。間日夕過從。徵歌度曲。以相娛樂。敬夫將填詞。以厚賞募國工。杜門學按琵琶三絃。習諸曲。盡其技。德涵尤妙於歌彈。酒酣以往。擲彈按歌。更起爲壽。今所傳潯西行樂詞。風流餘韻。猶令人想見也。

春興

憶在梁園詩興發。康王城北見黃河。信陵公子蕭條盡。白髮侯生感慨多。落日酒酣提劍舞。中流風起扣舷歌。十年徒侶仍疏闊。裊裊行雲奈爾何。

雨晴遊後園

濃雲初斷暮山雨。返照忽明春徑泥。樹底花落何忍見。牀頭酒香誰共攜。家家寒食月欲上。處處鞦韆牆  
更底。奚奴款段莫相負。明日出游還水西。







# 明詩紀事卷四

## 丁籤

鄭善夫三十一首

善夫字繼之。閩人。弘治乙丑進士。除戶部主事。改禮部。以諫南巡杖闕下。尋乞歸。用薦起南刑部郎中。改吏部。有少谷山人集二十五卷。

國寶新編。繼之氣秀巖谷。發情聲詩。雖才韻弗充。而古色精言。高映霞表。飄飄然有逍遙遠舉之志。

藝苑卮言。鄭繼之詩。如黃河冰稜。石嶺天骨。繼之初不識王儀封廷相。作漫興詩有云。海內談詩王子衡。春風坐遍魯諸生。後鄭卒。王始知之。爲位而哭。走使千里致奠。爲經紀其喪。仍刻其遺文。人之愛名也如此。

藝圃擷餘。鄭善夫氣骨稜稜。差堪旗鼓中原。

國雅。繼之才賦英邁。往往有新語。

鄧原岳西樓集。先生詩以氣格爲主。以悲壯爲宗。古詩樂府。原漢魏。下及六朝。歌行近體。抵掌少陵。絕句翩翩。有青蓮之致。書法尤入神。真行斟酌聖教。狂草奔放。縱橫爛漫。顛素而下。弗論也。間又創意。點染花草。叢篠怪石。得象外趣。

鄧原岳閩詩正聲。洪永之間。專譚興趣。則林膳部。王典籍。名其家。弘正之時。氣格爲宗。則鄭吏部。擅其譽。談藝集。繼之沈鬱之思。慷慨之詞。如蒼松挺秀。古梅含芬。

集竑筆乘。予家有善夫批點杜詩。其指摘疵類。不遺餘力。然實子美之知己。餘之議論離多。直觀場之見耳。嘗記其數則。一云。詩之妙處。正在不必說到盡。不必寫到真。而其欲說欲寫者。自宛然可想。雖可想而又不可道。斯得風人之旨。杜公往往要到真處盡處。所以失之。一云。長篇沈著頓挫。指事陳情。有根節骨格。此杜老獨擅之能。唐人皆出其下。然正不以此爲貴。但可以爲難而已。宋人學之。往往以文爲詩。雅道大壞。由杜老啓之也。一云。杜陵只欲脫去唐人工麗之體。而獨占高格。蓋意在自成一家。不肯隨場作劇也。如孟詩云。當杯已入手。歌妓莫停聲。便自風度。視玉佩仍當歌。不啻霄壤矣。此詩終以興致爲宗。而氣格反爲病也。善夫之詩。本出子美。而其持論如此。正子瞻所謂知其所長。而又知其敝者也。

列朝詩集。林尙書貞恆撰。福州志。刺少谷詩。專做杜。時靡天寶。地遠拾遺。以爲無病而呻吟。以毅皇帝時政觀之。視天寶何如。猶曰無病呻吟。則爲臣子者。必將請東封頌巡狩而後可乎。甚矣尙書之慎也。

徐通晉安風雅。正嘉之際。鄭吏部善夫。實執牛耳。虎視中原。而高傅二山人。左提右絜。閩中雅道。遂曰中興。筆精。鄭繼之。野興詩末云。年來混迹漁樵下。況有銅鞮伯氏風。用春秋晉叔向兄。銅鞮伯華事耳。向見鄭詩刻本。疑用白銅鞮故事。改曰習氏。不惟失作者本意。而於題旨句法。不相符矣。

閩小紀。鄭善夫嘗雪中遊天台。美髯白皙。毛褐筍輿。戒從者勿言姓名。人以爲神仙。甚傳郡中。太守顧璘聞之曰。此必吾繼之。亟使人要之。善夫答以詩云。客有飄飄者。閒來湖海遊。雲端尋雁宕。雪裏過台州。白業藏賢達。浮槎近斗牛。豐干漫饒舌。太守是閩邱。

堅瓠集。鄭少谷上秦陵詩云。苦憶焚香賜第日。報恩真愧濟時才。蓋秦陵乙丑科。宮中焚香祝天。願得賢才以輔太平。故云。明詩選。陳臥子曰。繼之雅質。故鋪敘之言獨長。

池北偶談。宋明以來。詩人學杜子美者多矣。予謂子瞻得杜氣。魯直得杜意。獻吉得杜體。鄭繼之得杜骨。龍性堂詩話。吾郡林子羽。鄭繼之。成工七律。子羽刻意三唐。已造堂奧。繼之髣髴工部。幾奪神骨。

潘德輿養一齋詩話。鄭少谷古厚鬱轡。七子外別樹一幟。田按少谷清才。集中仿魏晉以來。無所不有。但摹杜爲多耳。大約氣格雄渾。五律歌行昂勝。音節瀏亮。七言律絕爲優。但摹擬極肖。融化爲艱。短製偏工。大篇未化。其品次在何李邊。徐之亞。餘子不及也。

### 古意二首

蓬門霜雪繁。玉顏苦禁當。稍識春風面。春風轉斷腸。  
寶鏡皎如月。價值千黃金。偏照可憐色。不照可憐心。

### 登雲居山

搜奇頓欲改。禹穴未得傍。忽慕麥斜巖。玄境足佳況。連峯削芙蓉。石門天下壯。篔簹復修織。天聲落屏嶂。雲居獨奇絕。遐思愈飛颺。以茲發高蹤。力欲排雲上。百息徑嶮艱。一眺極沆漭。鵝鸞稅仙驂。芝蓀洗凡狀。試按山海圖。一一皆不妄。雖然羸瘵成。已過平生望。應悲蜉居子。兀兀坐盆盎。吾將從盧敖。直與雲霧抗。西凌崑崙風。東薄滄海浪。前期邈悠悠。拊膺以惆悵。

### 龍溪

志士樂巖棲。巖前幽鳥啼。長風吹瀑布。飛過白龍溪。祇道桃花發。桃源處處迷。

陪王中丞夜遊治平期到上方不果

湖上興不極。復治東山具。執策入治平。繁霜溼衣履。山僧不好客。高臥闔庭戶。清商動木末。靜聽不知處。遙看上方勝。子夜發襟素。情長事乃違。咫尺不得據。月落空歸來。寒猿挂深樹。

虎邱懷古

巖巖虎邱山。盤盤闔閭墳。墳頭閱古蹟。劍池三千春。蛟龍山中藏。白日噓煙雲。圖王事已空。萬骨成灰塵。淇盧南入楚。神物焉能馴。不必賣薪女。王氣已湮淪。

桃源行

黃河水盡蛟龍馴。桃源沙飛愁殺人。東方亂後再反覆。憶昔過此增煩辛。扁舟困頓不得攜。賊濠只在河東西。路官邑子微服走。大屋高門豺獍啼。到今事定還是非。請問流民歸未歸。

畫山水引

天風盤松翠蛟吼。白浪浮山蒼兕走。月落未落光射空。道人夢在滄州東。雲冠雪鬣烏皮几。皓首相從只黃綺。我亦天台採藥師。爲君更託蓬萊水。

登七十二峯閣歌

吾聞太湖東注三千水。乾坤納納幾萬里。東西洞庭天際起。七十二峯如聚蟻。青天白日飛雪雨。兵塵慘慘滿人間。故國何處愁路難。五湖多風不可渡。入山魍魅相依附。若爲化作鴻冥冥。南向峯頭結煙霧。終

焉身重飛不得。展轉湖邊倚高閣。湖昏閣靜百感集。悵望毛公謝烏鵲。嵩高西去尋靈藥。

大游篇贈高宗呂

登山須騎五色羊。涉水須泛無倪航。一身之小四海遠。紅光瞥影明煌煌。年少離居歷寒暑。孤鳳冥鴻自高舉。東封碣石入羅浮。十洲山水猶能數。世人未斷區中緣。頑腹無腸萬愁貯。炎趨聲利赴火蛾。戀食癡鴉嚇腐鼠。吁嗟乎。吾求此輩無其曹。翛然六合解天弢。上乘灑氣懷宇高。丹山碧水相週遭。仰天大笑秋蕭騷。九州熱客從滔滔。高生高生縱遊遨。

觀雁宕龍湫

瀑布飛不徹。大聲空谷哀。青山下河漢。白日莽風雷。潭穩蛟龍定。歲深鴻雁來。方巖倚天畔。吾志在崔嵬。

大田篇

禁直三千士。長拳鎮國旗。甲戈迷塞月。繒帛款胡兒。大禮初回蹕。春原更打圍。後車載光寵。不數漢昭儀。

送林以乘謫夷陵

宜都三峽口。遷客意如何。落日黃陵廟。秋風駭浪多。巴蠻伐鼓祭。江女踏蹠歌。莫唱渝州曲。猿聲近汨羅。

問宗林

昔遊湖上寺。猶祀釋宗林。語我菩提樹。恆河深復深。風沙晚識面。江海後知音。白鶴翩翩去。青天何處尋。

十日對酒姚氏園

病跨山公馬。秋過習氏池。遠天鴻雁盡。昨日菊花期。碁局翻相惱。鷗羣總不疑。生涯抱甕外。一任隱君爲。

城戍

戍鼓長鳴夜。軍容更入朝。北風塵漠漠。南討意迢迢。祇有蒼梧狩。能無黃澤謠。遐方盡玉帛。八駿自應驕。

宿歸雲菴

澤國變元氣。名山留晚芳。雲藏伏虎寺。花近挂瓢堂。鵝鶴飛騰遠。漁樵言笑長。沈冥達者事。散地卽慈航。

宿勝果寺

遊吳復適越。漫宿贊公房。小隱薜蘿密。大觀江海長。鉢龍蟠夜壑。雲篴語秋堂。稍覺菩提長。森森松檜涼。

九日方山登高

方山五片石。巉截七千尋。氣象恆嵩敵。風雲歲月深。百年大夢寐。九日此登臨。願卸紅塵累。岩棲長道心。

早秋懷晉安諸子

搖落菱湖晚。湖邊鷓鴣鳴。秋風吹桂樹。一佇越王城。榻有南州重。人兼衛玠清。還聞刷羽翮。看爾共蜚聲。

重遊大石次劉德義韻

幽事住雲泉。湖光遠接連。寺鐘山意動。松雨澗聲懸。石壁開雲竇。桃花隱洞天。中原尙多壘。此地合逃禪。

雙雁

雙雁爲人得。階前相向鳴。已辭關塞遠。猶帶網羅驚。宦情一片影。客淚五更聲。側目窺秋隼。風煙異性情。

明妃曲

明妃初出塞。宛轉意何窮。上馬琵琶曲。流悲入漢宮。自言妾薄命。萬里去和戎。今日靡蕪草。青青向隴中。

汎木蘭

木蘭山下陂水清。南洋北洋風日晴。慣乘舴艋中流穩。頗愛棠梨兩岸明。石塹沙隄回海勢。鳩鵲鸚鵡亂春聲。漫回雲莊望莆口。更從壺頂看蒼瀛。

至日長陵陪祀

長陵西接黃花寺。白雪蒼巖夜色遙。陰殿衰龍猶在目。往時松柏已干霄。總聞一怒風塵起。想見千官遷次朝。悵極兩京興廢事。小山何意起漁樵。

上妙高臺

雲海冥冥望不迴。鯨波東蹴巨靈開。中天樓閣虛無裏。南國風煙江漢來。世短動經多事日。愁長況上望京臺。白門金鼓維揚卒。落日空傳黃竹哀。

亭子

遲清亭子對羣峯。地迴能招萬里風。八月商聲疏病葉。滿城暝色起寒蛩。身孤舊國翻成客。世短長年是惱公。擬把衰容向山月。嬋娟猶在亂雲中。

武夷曲次晦翁棹歌

沙棠爲楫桂爲船。紫嶂丹崖錦映川。我是開元李居士。鐵龍吹散萬峯煙。

赤城懷太白山人

天台歲月輕劉阮。不見雲端雙玉簫。知爾西湖臥風雪。神遊先到石梁橋。

送人之鬱林

鬱林東下對扶桑。黑霧沈山日暈黃。鷓鴣啼上桄榔樹。一寸鄉心萬里長。

蜀中歌

峽猿啼過下牢關。雪嶺連天三百盤。錦官城外西遊客。白日高歌行路難。

張琦十三首

琦字君玉。鄞人。弘治己未進士。除南大理評事。歷寺副寺正。出爲興化知府。進參政。致仕。有白齋竹里館二集。

見素集。白齋詩疏宕孤絕。如峻峯激流。景出象外。雖雜備衆體。而收功實由山谷甯川一派。今流明州矣。



藝苑卮言。張君玉詩。如夜蛙鳴露。自極聲致。然不脫淤泥中。

甬上耆舊集。先生詩。吐咀山川。驅使雲鳥草木。與一時詞人絕不同。

田按白齋詩。如飲苦酒。食諫果。森森自有正味。在李何盛行時。不可無此一體。

### 乞王廷直山水歌

我詩未工不如畫。王君工畫過我詩。幽谷水遠草木際。詩意未到畫盡之。十年懷才近禁籞。天光映筆生神氣。五日一日得偃休。門中清客揮不去。如我老迂無所長。愛君之畫不能寐。眼中有我常十分。爲我用筆如用軍。黑逼太陰晴作曠。白橫草樹青連雲。尙恨窄幅如短裙。未足展運游無垠。昔時韓幹名善畫。伯時老格真其亞。當年交遊最有人。少陵山谷相聲價。千秋萬歲作者稀。我詩頓覺無光輝。何當生絹一片裏。致我詩句登元微。

### 浴鳧軒爲封君林太守

小江曲湖莊門幽。白石硜藤來不休。有鳧飄然倦雲遊。下與魚鼈爭春流。先生野情適相求。鳧亦不去同沈浮。汝羽修修吾白頭。人間日月如馳驅。萬錢爲買木蘭舟。千丈深潭下直鉤。海翁前身曾狎鷗。與物並育物誰仇。天隨鬪鴨尙機謀。還讓先生居上游。

### 送翁長官分韻得樹字

江寒鳧鴨方念羣。江頭艇子不肯住。衆客臨江動愁色。雲邊直指象州路。願君爲我立斯須。高歌一曲白日暮。海邦居人曾未知。東風已動桺榔樹。

風雪圖歌

晚家西山傍老姥。十月作雪天惡苦。斗新翦茅成小屋。只開東窗閉北戶。樹梢撲地落凍螭。啾啾瓦雀吟朝飢。禽蟲此時若不利。山客高齋今獨宜。五斗秫米作酒釀。阿嬪來言勿沽店。鮮魚出冰黃玉光。松火入突碧煙燄。我笑袁公誠老迂。雪中僵臥如小夫。復笑子猷好生事。衣半擊漿依風蒲。不如坐對家人面。酒酣高歌一曲還敲壺。

越中盛水感事

短髮扁舟越水濱。斜風亂雨夢中身。四更水白先疑曉。二月山寒未受春。新燕舊巢來有所。孤村獨樹住無憐。城隅零落殘僧影。猶似吳兵過後人。

新正與朝用唱答用韻

海霞照屋曉光高。春事關心睡不牢。人到百年一過客。吾當十日九揮毫。時名滿地忘消息。諧謔隨宜散鬱陶。料理東風今有準。轉頭吹到使君袍。

春懷

老夫饒白髮。背立桃花樹。寄書匡廬僧。春山共來去。

包氏東園

理蔓牽新綠。疏泉放落紅。敲門春午寂。有客夏黃公。

藥壠

地仙不愛穀。種藥方橋右。久雨不出門。猪苓大如手。

直河

白草寒煙沒。燒痕鷓鴣飛。處有柴門。直河莫道無關束。一曲河流抱幾村。

偶成

半醒半醉倚繩牀。枕石江樓水氣涼。豆莢筍長瓜杵大。滿天秋興到南莊。

閒居

山客敲門不肯應。青藤倚壁坐橫肱。秋懷萬里誰知我。天目孤雲雁宕僧。

二月二日

江上輕雲覆戶低。杏花開好未黏泥。伯勞猶更嫌春淺。背坐東風不肯啼。

孫一元三十七首

一元字太初。自稱秦人。或曰安化王孫。或曰蜀人。莫得其詳也。有太白山人漫稿八卷。

四庫總目。王世貞題孫一元墓詩云。死不必孫與子。生不必父與祖。突作憑陵干古人。依然寂寞一抔土。蓋其縱迹詭異。當時卽莫之詳也。嘗棲太白之巔。故稱太白山人。又嘗西入華南。入衡東登岳。又南入吳。與劉麟、吳疏、陸崑、龍霓稱茗溪五隱。一元才地超軼。其詩排冝凌厲。往往多悲壯激越之音。靜志居詩話謂其瓣香在黃庭堅。體格固略相近。然庭堅之詩沈思研練而入。故蟠拏崛強之勢多。一元之詩軒豁披露而出。故淋漓豪宕之氣盛。其意境亦小殊也。

國寶新編。太初風儀秀朗。蹤迹奇譎。玄巾白袷。混游貴賤。常以鐵笛鶴瓢自隨。遇所會心。輒一傾倒。蓋隱淪之高逸。性好吟詩。初談導引人。疑其仙。晚嬰婚娶。入司空劉公湖南雅社。詩辭備極苦心。所乏天才也。空同集。太白山人善詩。有超逸才。亦多爲忿激悲壯之音。

少谷集。太初詩悲壯奇崛。感奮激發。而卒澤以沖和。劉麟清惠集。太初爲詩先氣格。有刮鬪胃腎之功。

殷雲霄石川集。太白山人詩。喜爲盛唐人音節。凡感佚思作。可喜可愕可悲可嘆。一以寓之。發之以豪縱恣肆。時出入畦徑。方豪棠陵集。山人以其雄壯渾厚之資。肆之以詭怪佳麗之觀。若甘和白采之合美。故其詩往往爲人所傳。

藝苑卮言。孫太初詩如雪夜偏師。間道入蔡。又如鳴蜩伏蚓。聲振月露。體滯泥壤。太初玉立美髯。風神俊邁。嘗寓居武林。後文憲罷相東歸。訪之。值其晝寢。孫故臥不起。久之。少師坐益恭。孫乃出。又了不謝。送之及門。第矯首東望曰。海上碧雲起。遂接赤城。大奇。大奇文憲出。謂馭者曰。吾一生未嘗見此人。

櫻谿集。太白詩秀潔而出塵。

國雅。太白山人才清趣逸。頗擅詩名。曾寓先公蓉湖別墅。時與殷靖江近夫游。先公每論其高致。浪游西湖茗溪間。一時名士咸欽其風。其佳句。有山根晴亦濕。湖氣夜難昏。長天下遠水。積霧帶巖扉。僧歸虹外雨。雲抱水邊樓。浪花迎棹尾。山影上人衣。

清流梳石髮。遠霧著山巾。酒醒燈暈裏。秋墮葉聲邊。又百年知己。長纒在。萬事無心拄杖間。遠江天。入星河濕。高木谿回風露稀。嚴儀卿曰。詩有別才。非關書也。詩有別趣。非關理也。豈不然哉。大都孫詩。五言得孟襄陽幽處。七言得張句曲曠處。遂致迥庭懸絕。

明詩選陳臥子曰。山人詭迹塵外。清放自居。故有俊調而鮮深思。終近淺俗。

田按山人詩。激宕處亦是摹杜。而練句練字。時出入於王摩詰。孟襄陽。岑嘉州。諸公間。長歌氣魄稍弱。律絕固是一時之秀。

班婕妤

紈扇歌初歇。開簾草又新。如何雙燕子。占斷六宮春。

題梅花贈太守黃子和

使君作郡滄州邊。我曾一見神翛然。長髯方瞳有仙骨。種梅猶記羅浮巔。瓊盤鐵曲一萬本。茅屋正在春風前。寒姿自照日杲杲。白鶴下叫青溪烟。我歸管領君勿嗔。采花拾實還候君。

致道觀看七星檜樹歌

海虞山前突兀見古檜。眼中氣勢相盤拏。上應七耀分布有神會。地靈千歲儲精華。皴皮無文盡剝落。老根化石吞泥沙。據山巔崑。曠壑訝訝。身枯溜雨。枝黑藏蛇。佇立頃刻雲霧遮。日落未落山之厓。同行觀者皆嘆嗟。舌捫頸縮無敢譁。歸來靈物不可究。夜宿撼牀恐龍鬪。

吳偉瀑布圖

何人畫此瀑布圖。巔崖老樹雲模糊。風前披拂佇玩久。筆力乃是江夏吳。吳生當世名第一。揮毫落紙人莫及。骨格老硬神氣清。飛濤激石石欲立。懸岩遠勢亦可愛。直瀉似是廬山派。榭葉瑟瑟天風來。晴沙碧嶼蒼茫外。美人隔水把瑤草。鴻雁雙飛鷓鴣小。天寒日暮意無極。青石漠漠望中杳。我生蹤迹真好奇。年來遠結滄洲期。眼中見此足幽賞。分泉煮石聊自怡。

效孟浩然

春水長蘭苕。春鷗來復饒。雲光欲到地。江色澹相搖。濁酒同漁父。輕風動野袍。峴山斜照裏。歸去趁鳴橈。

癸酉六月望夜同施邦直棹舟西湖歷六橋抵望湖亭乘月登孤山拜和靖處士墓

向晚南屏路。相攜上釣船。山根晴亦溼。湖面夜難昏。月色留吹笛。鷗羣迴洗樽。來尋林處士。地下有知言。

幽居雜興

歸臥茅檐下。讀書終愛貧。鶯聲十年事。草色滿城春。道喪悲浮俗。情高夢古人。眼前君莫問。吾與酒杯親。

贈顧華玉謫全州

桂嶺經行處。泉聲日夜潺。飛蛇晴挂樹。毒霧晝沈山。去國鳴孤楫。傳詩到百蠻。柳侯讀書處。遺像沅湘間。

避寇吳興山中

日暮漁樵散。山空河漢明。柝聲悲永夜。戎馬閉孤城。去國美人盡。感時黃葉生。酒杯徒自好。極目一沾纓。

西湖

十里山如拭。西湖背郭流。僧歸虹外雨。雲抱水邊樓。春事多逢醉。歌聲半是愁。獨憐垂釣者。吾欲共滄洲。

秋夜不寐

造物終難料。夜長耿不眠。酒醒燈暈裏。秋墮葉聲邊。盆盎乾坤夢。溪山藜苒緣。平生陳正字。死不受人憐。

荆溪道中

樹夾蒼崖立。遙遙溪路微。浪花迎棹尾。山影上人衣。飢鵲鳴將下。頽雲凍不飛。還尋舊遊處。日暮漁樵稀。

幽居

自得窮通理。幽居不誤身。清流梳石髮。遠霧著山巾。竹上僧留偈。庭前鶴近人。科頭坐終日。吾自愛吾真。

山寺對雪

寒入山中寺。今晨雪意逢。清樽留客過。野興對僧濃。別渚迷鷗影。深林印虎踪。此時誰會我。倚杖立高松。

獨往

無媒幽徑迴。笑語領東風。遠燒攙新綠。寒花動小紅。野情藜杖底。詩句酒杯中。一路春相候。何人識化工。

僧明秀東林別業

結屋東林下。市塵迴不聞。疏花寒照雨。老樹暝巢雲。摩詰元非病。懶殘不忌葷。茆檐兀坐處。萬物自芸芸。

石林

亂石生寒靄。殘林帶晚曦。松涼供睡穩。山靜與詩宜。入洞隨猿跡。登崖割蜜脾。竭來天壤內。此地可棲遲。

失鶴六首錄二

只在秋江上。孤蹤竟所之。花間扶杖處。竹外聽泉時。野客來玄圃。山僧寄紫芝。此時還憶汝。伴我夜吟詩。只在秋江上。煙霞幾萬重。階前留墮羽。苔面想行蹤。雲影忽傍水。月明猶在松。此時還憶汝。跨我出樊籠。

閔元衢歐餘漫錄。孫太初寓武林南屏山。嘗蓄一鶴自隨。與給事杞泉子善。許爲置田三畝。歲輸粟於萬峯深處。以充鶴糧。而作券予之曰。太白山人鶴田。在九杞山書院之陽。倚山面湖。左林右涂。廣縱百步。計歲入粟三石有奇。以其奇爲道里費。而歸其成數於杭之西湖南屏山。歟。歲則汰其半。以主人潤筆金取盈焉。佃之者主人之鄰某。輸之者主人之僕某。董之者主人之弟某。主人謂誰。山人之友。杞泉子許台仲甫也。後太初開籠調鶴飛去。迺用唐人想伊只在秋江上之句。首尾作詩六律。兩人風趣。雖林君復亦當欣讓。山人之詩。人習知之。許公之券。世罕知也。余故備錄。以爲士林奇話。

寄顧台州華玉

使君有道氣。爲政亦山中。坐見桃花色。青林度遠風。才堪一世用。官與衆人同。飢食會溪橡。長歌興不窮。

贈黃得之

我愛黃江夏。雲山夙有期。風流懷上世。瀟灑有清詩。笑拾滄江月。行歌青桂枝。嵇康得石髓。王烈許從師。

久雨書悶



窮日閉茅屋。雨深境更清。楮眉上行蟻。牆角臥空罌。時序了長句。生涯終短檠。回風搏曠野。新水漲柴荆。入夢暮雲碧。懷人秋蘚生。荒雞啼遠戍。山鬼嘯空城。袞袞風難定。悠悠事屢更。關河成阻越。盜賊正縱橫。看劍哀歌咽。啣杯意氣傾。紀綱須汲黯。諫疏憶匡衡。十載居南服。同時笑北僮。鸞雛飢欲死。汗血老無名。極目煙波闊。回頭布褐輕。誓將一竿去。吾欲弄滄瀛。

卜居東甘泉山人

歲晚卜居草堂靜。長日宴坐人迹稀。梅花不開凍雲合。雪片忽墮山鵲飛。春杯到手何意味。江風隔岸吹客衣。歸來道路不須問。雲谷丈人還可依。

山居著野服

道人占斷南屏景。十里青山帶郭斜。對水柴門通鶴渚。隔鄰烟火是漁家。岳頭老檜占風雨。石上昌陽閱歲華。粧點太平還著我。棕鞵桐帽送生涯。

贈鶴井引

殷近夫養二鶴每予至輒相對舞愛而作詩贈之

爲愛使君雙鶴舞。杖藜相過水雲鄉。入門瘦影當窗見。隔樹閒行共我長。碧海青天憐昨夢。朱琴瑤月鬪圓吭。他年結屋羅浮上。萬樹梅花待汝翔。

癸酉中秋同吳興凌時東海昌董子言陳用明西湖玩月爛醉歌此  
十里蒹葭雨乍收。西湖一望月光浮。野袍白幘同幽事。菰米蓮房作好秋。  
波靜龜龍聽醉語。夜涼河漢帶漁舟。高情盡在形骸外。不用逢人說勝遊。

贈徐廷應

老翁白首負奇好。來往江湖稱地仙。野鷺沙鷗各解事。青蓴紫鱖甯論錢。  
月明滿地夜呼酒。山色半帆秋放船。偶過海門訪獻父。相逢各誦雲煙篇。

種竹

種竹荒岡手記曾。滿林蒼翠盡騰凌。遙連野水青無間。斜壓秋雲冷不勝。  
慣覓漁竿防稚子。祇分拄杖與山僧。黃陵歌罷無人和。明月闌干只自凭。

至日攜榼登道場山

瞥眼風塵歲屢遷。椒盤柏酒自留連。半生作計閒爲上。到處論交山最賢。  
好句忽成黃葉寺。小舟漫倚白鷗天。松聲泉語無人會。獨坐岳頭意已傳。

四溟詩話。孫太曰。到處論交山最賢。以山爲賢。蓋有所祖。周禮曰。輪人五分其穀之長。去一以爲賢。禮記曰。某賢於某若干。

純。謝靈運曰。豈於名利之場。而賢於清曠之域哉。唐太宗曰。李勣守并州。突厥不敢南。賢於長城遠矣。

衡門

投老衡門不用名。閒雲時伴一身輕。牀頭酒盡春剛去。座上山青詩又成。淺水短蒲蛙閣閣。澹烟修竹月盈盈。憑誰爲問天隨子。藥草新生較幾莖。

解衣

解衣坐漁梁。水風來許許。月明不見人。幽篁自相語。

息游所

枕簟對青山。琴樽事幽暇。日夕宴坐餘。庭除雙鳥下。

秋夜

道人宴坐起。推窗時一吟。白鶴忽不見。月明秋滿林。

席上偶成

楊花燕子弄春柔。醉倚筇篻笑未休。依舊清風明月好。買船吹笛過滄洲。

竹莊

小築閒莊枕水潯。繞牆種竹已森森。亂紅吹盡春無幾。借看君家秋一林。

西湖

十里飛花送酒后。六橋兒女踢春詞。無人會得漁翁意。獨立晴湖照影時。

嘗吳中橘酒戲成

大觥落手流香新。醱醖葡萄渾失真。祇應常在句吳住。要與木奴作主人。



# 明詩紀事卷五

## 丁籤

顧璘二十四首

璘字華玉。先世吳人。徙上元。弘治內辰進士。授廣平知縣。入爲南吏部主事。進郎中。出知開封府。降全州知州。歷台州知府。浙江左參政。山西、江西按察使。浙江布政使。擢都察院右副都御史。巡撫山西。乞終養。忤旨落職。尋起。巡撫湖廣。遷刑部右侍郎。改吏部。再改工部。晉尙書。督顯陵工竣。還朝。改南刑部尙書。有浮湘、山中、憑几、歸田、息園、緩慟、諸集。

四庫總目。璘集遠挹晉安之波。近驂信陽之乘。在正嘉間。不失爲第二流之首也。

甫田集。東橋居士詩。矩矱唐人。而剗芟陳爛。時出奇峭。

藝苑卮言。顧華玉詩。如春原盡化。芭靡不少。

四友齋叢說。顧尙書東橋好客。其坐上常滿。又喜談詩。余嘗在坐。聞其言曰。李空同言。作詩必須學杜。詩至杜子美。如至圓不能加規。至方不能加矩矣。此空同之過言也。夫規矩方圓之至。故匠者皆用之。杜亦在規矩中耳。若說必要學杜。則是學某匠。何得就以子美爲規矩耶。何大復所謂舍筏登岸。亦是欺人。

金陵瑣事。顧東橋公鎮楚。三司請遊黃鶴樓。先磨一石。飲後乞公留詩。東橋在輿中。已得雲荒赤壁二句。遂援筆書石上云。黃鶴仙人身姓隨。空傳崔灑舊題詩。雲荒赤壁周瑜壘。江繞青山夏禹祠。浮世古今堪灑淚。高樓今古幾銜卮。天寒月白孤鴻遠。徒倚闌干送目遲。三司皆服其工。

國雅。顧司寇體裁變創。工於發端。斐然盛明之羽翼也。如經旬謝賓客。春草當門生。鹿飲紅泉細。猿啼翠壁重。綠樹邀行騎。青山擁寺門。足使文通變色。彥升失步。

明詩選。陳臥子曰。華玉才調警麗。但風格未高。

列朝詩集。華玉少負才名。舉進士。卽自免歸。與陳侍講沂。王太僕章。肆力爲詩文。時稱金陵三俊。官留曹六年。學益有聞。所與游若李獻吉。何大復。徐昌穀。相與頡頏。上下聲名藉甚。詩才情爛然。格不必盡古。而以風調勝。延接勝流。如恐不及。詔修承天。大志。聘楚名士。屏棄者。王廷陳。王格。顏木。分任之。書成不稱旨。士論以此益附之。晚歲家居。文譽藉盛。又居都會之地。希風問業者。戶履恆滿。構息園。治幸舍數十間。以待四方之客。客至如歸。命觴染翰。留連浹歲。無倦色。卽寸長曲技。必與周旋。款曲。意盡而後去。喜設客。每張燕。必用教坊樂工。以箏琶佐觴。最喜小樂。工楊彬。常詫客曰。蔣南泠詩。所謂消得楊郎一曲歌者也。正奏樂時。每發一談。則樂聲中闕。談竟樂復作。議論英發。音吐如鐘。每一發端。聽者傾坐。咸以爲一代之偉人。處承平全盛之世。享園林鐘鼓之樂。江左風流。迄今猶稱爲領袖也。

靈隱寺

水泛趣已緜。山行路仍窈。迤邐經層巒。花宮冠林杪。峭壁倚青霄。下映樓觀小。崖傾樹孤撐。亭遠泉重繚。蕭條僧氣閒。肅穆人聲悄。來遊屬秋暮。蕉葉青嫋嫋。入室薰名香。憇澗狎幽鳥。顧瞻桃源幽。捐佩苦不早。誅茅儻吾遂。庶離塵中擾。

桐廬江行寄江僉憲一夔

曉發富春渚。暮望桐廬宿。江空寒水淨。岸轉雲峯矗。孤帆緬透池。霽景聊寓目。渺渺沙際村。浮煙靄叢木。垂巖杞菊斑。覆隴禾黍熟。茲方靜無虞。生理見耕牧。高賢涖行臺。敷政況清肅。沈憂正浩蕩。且用慰心曲。聞灌人云有。柳子厚遺跡。因策馬往尋。歷大源塘入仙源洞。不得其處而返。

柳侯昔放逐。頗好山水事。觀其著文詞。動以喻來世。逮今歲月改。陵谷莽遷異。我行徂灌川。聞有招隱地。懷賢慰遐思。弔古積幽思。塵館休吏衙。秋原散遊騎。度嶺疲登頓。涉溪苦沾漬。空潭激哀流。古木墮餘翠。窮搜盡陽景。屢剔斷碑字。豈無會心觀。往往悖圖志。興盡且須返。聊以展幽致。

瀘于髡

籠鵠誠譎誕。斗酒亦顛狂。談言雖微中。滑稽令人傷。不如鬼谷子。默默能深藏。

蕉石亭

怪石如筆格。上植蕉葉青。蒼然太古色。得爾增娉婷。欲攜一斗墨。葉底書黃庭。拂拭坐盤薄。風雨秋冥冥。

春日行

漢家三十六離宮。桃花樹樹搖春風。武皇當年正好武。天馬七尺如飛龍。清晨蹋踰過新市。薄暮鳴鞘入禁中。中人盡戴鷓鴣冠。猛士半坐黃金鞍。彎弓向雲仰射雁。一發兩禽皆道難。大官賜酒碑磔甌。一春擊

盡千肥牛。撞鐘伐鼓獻奇舞。燈前變幻魚龍浮。宮門沈沈金鑰收。明月挂在城西樓。東方漸高復來遊。

挂劍圖

延陵公子有道者。義氣千秋動華夏。去時寶劍心許君。死後仍來懸墓下。白日青天一片心。豈因生死惜千金。寄言反覆輕薄子。三步腹痛休哀吟。

鄒平王寫竹爲羅子文賦

寫竹貴神不貴色。畫師俗筆難爲力。古來能事自天成。蕭郎文老何由得。國朝作者夏奉常。祇今僅見鄒平王。金殿晝閒一揮灑。遂令縑素移瀟湘。兗州太守得真迹。草堂白日寒雲積。風葉當軒簌簌鳴。霜柯倚座森森碧。清泉怪石映帶成。卽恐春筍驚雷生。炎天對坐毛骨爽。便欲掉臂林中行。嗚呼絕藝不可遇。千金競買珊瑚樹。君不見寒士土木形。遮道時逢貴人怒。

次孟侍御醉何舍人仲默見寄之作

京洛何平叔。傳詩動我哀。同時座上侶。共向嶺南來。暮笛梅花落。秋醅竹葉開。相期不相見。悵望碧梧臺。

會稽雜咏同周觀察作

春草孤舟遠。春波百頃開。鏡湖猶在眼。賀監不重來。酒換金龜去。身辭玉署回。文章真小技。跌宕見高懷。

花藥寺宋徽宗出家處



古佛祇闍苑。前朝帝子居。龜龍纏石碣。虎豹守松廬。塵海波翻覆。人天事有無。想臨煩惱障。應悔就金輿。  
沛上懷古

漢祖還鄉歌大風。高臺提劍氣成虹。關西父老三章約。垓下河山百戰功。祇見粉榆生故社。屢聞雞犬變新豐。經過又是高陽侶。醉折桃花薦酒紅。

龍湫

龍湫之水從何來。崑崙倒注青天回。絕壁風吹動高練。暗潭石轉喧晴雷。終年野僧對閉戶。暇日老翁來洗杯。酒酣且去莫狼藉。玄猿瞰客唬聲哀。

晚投高樓寺讀石沙王侍御詩愛其奇戲擬四韻

乘春問俗行何遠。望奇停車興亦奇。激澗水喧高下石。晚林鶉競後先枝。崑藏峭閣鳴鐘隱。雨溼涼雲出樹遲。一漾江南風景好。踏青難共美人期。

出靖州

黃鶴秋雲已隔年。五溪春色異風煙。池心濺墨生蝌蚪。花血流紅綻杜鵑。孤負江南桃菜會。了還天外挂弓緣。比來溼病全拋酒。且喜家貧省秣田。

松隴草堂新成雜興二首

野日遲遲陰更晴。山人睡起絮袍輕。松梢宿露因風墮。草際浮雲傍水生。一壑無多堪獨往。百年強半復何營。神仙服食長相誤。不如清尊對客傾。

郭外新移野老家。舊書猶載兩牛車。樽空北海虛耽酒。地薄東陵漫種瓜。小徑衝門分野竹。短籬臨水透溪花。優游行樂元無盡。落魄浮生詎有涯。

擬宮怨四首

水殿夫容隱暗霜。夜臨新月自焚香。窗間畫扇含秋思。帳裏華燈隔夜光。四壁椒塗花靄散。六宮蓮漏水聲長。君恩未必緣歌舞。無那昭陽掌上狂。

翠靨金蟬人帝家。擬將新寵屬鉛華。君王自信圖中貌。靜女虛迎夢裏車。帳殿秋陰生角枕。屨廊空響應琵琶。含情獨倚朱闌暮。滿院微風動落花。

漢皇宮殿月明時。曾侍宸遊百子池。舞馬登牀春進酒。盤龍銜燭夜觀碁。御前卻輦言無忌。衆裏當熊死不辭。舊恨飄零同落葉。春風空繞萬年枝。

不見彤墀日月旂。庭隅草木掩清輝。金輿到處無新舊。玉貌從來有是非。暮雨樓臺雙燕入。春寒池館百花稀。監宮一去無人語。獨自含顰咏綠衣。

庚辰元日

諸侯玉泉會長安。天子旌旗下楚關。共想元正趨紫殿。翻勞邊將從金鞍。滄江飲馬波先靜。黃竹回鑿雪未乾。北極巍巍天咫尺。五雲長護鳳樓寒。

明詩選李紓章曰。此爲武皇南巡也。隱諷中有實錄。謂甯王已獲。而御駕不歸耳。

### 葉澄畫

古琴彈古調。今人誰愛聞。獨往山中去。因聲寄白雲。

### 擬夏日宮中行樂詞

玉面朱脣映月明。影娥池畔繞花行。夫容不耐凋殘色。祇恐新涼一夜生。

### 陳沂三首

沂字魯南。先世鄆人。徙上元。正德丁丑進士。改庶吉士。授編修。遷侍講。出爲江西參議。遷山東參政。改山西行太僕卿。有遂初齋、拘墟館二集。

國雅陳魯南才與顧華玉。王欽佩並稱。如鳥聲林葉暗。山影石溪寒。懸燈動星月。轉梵起魚龍。漏轉雲車急。花深月殿開。鵲觀月華還映雪。龍池水色已含春。恍乎臨蓬山而俯瞰閩洲。深遠鬱然。

金陵瑣事。陳魯南書法蘇眉山。評者謂不減於吳匏庵。篆隸亦佳。六七歲便嫻筆模倣古人畫。後入翰林。與文徵仲講論。其畫更進。凡官游所歷覽。名山大川。皆圖成卷軸。長得馬河中。夏禹王之妙。

列朝詩集。魯南論詩。專以唐人爲宗。謂少陵七言。聲洪氣正。格高意美。非小家粧飾。但才大不拘。後學茫昧。特拾其蘆耳。於時

大江南北文士稱朱、顧、陳、王四家。朱、顧皆羽翼北地，共立壇壝，而魯南能另出手眼。訟言一時學杜之敝，欽佩亦與之同調。江左風流，至今未墜，則二君蓋有力焉。  
田按魯南論詩，鍼砭北地之失，可謂談言微中。但其所作去北地，乃不可以道里計。牧齋援魯南以攻北地，譬如挾邾莒小國以抗齊楚，多見其不知量也。

正旦卽事

帝輦時巡久未回，天門遙拜重徘徊。封箋自向慈宮進，方貢還同異國來。春轉青旂開羽仗，日臨金榜上樓臺。帷城尙在燕山外，誰獻正元萬壽杯。

武皇上賓同百官哭臨於思善門外

帝寢重扉寂寞開，鼎湖龍去可能回。芙蓉內殿初成後，虎豹離宮不再來。三月麻衣明曉雪，萬聲號動隱春雷。巡遊幸返蒼梧轡，供奉猶存玉几哀。

宸濠廢宮

章水故宮何處是，幾株衰柳亦從遮。金書葬地無劉渚，玉樹歌聲有麗華。秋日放鷹荒草陌，春風飛燕野人家。諸公臺省多休暇，每憶當時一歎嗟。

王韋一首

韋字欽佩，上元人。弘治乙丑進士，選庶吉士，授南吏部主事，改兵部，遷禮部郎中，出爲河南提學。

副使進南太僕少卿有南原集七卷。

國寶新編少卿論詩專尚才情其言曰唐風既成詩自爲格不與雅頌同趨漢魏變於雅頌唐體沿於國風雅言多盡風詞則微今以雅文爲近未嘗不流於宋也故其詩婉麗多致雋味難窮。

藝苑冠言王欽佩如小兒女簪花學作輓麗。

田按王欽佩陳魯南皆善於持論而詩不盡工。

### 閣試春陰詩

皇都二月春正深。東風釀煖淑氣侵。曙光溟濛露華滿。輕雲閣日天沈沈。野色垂垂十餘里。草綠柔陰低。池灑半空落絮溼。未揚百丈游絲寒不起。鶉鳩枝上相踏鳴。若與此景偏多情。空庭簾捲晝亦暝。隔牆惟見桃花明。小院門閒鶯自語。畫棟泥香燕初乳。苔花蒼潤上簾櫳。濛濛經雨還未雨。含情佇立憑闌干。遠峯漠漠登樓看。碧空窈窕銀屏冷。金帳促回翠袖單。檐影頻移暝雲動。曲枕悠然醒午夢。起來小步傍閒階。花霧襲衣寒氣重。

金陵瑣事南原王章秀才時夢中聞人誦詩云起來小步傍闌干花霧襲衣寒氣重及閣試庶吉士以春陰爲題南原憶夢中語遂寫入詩中主試李公西涯批二句有神助儲靜夫索南原詩看讀至小院門閒鶯自語畫棟泥融燕初乳擊節嘆賞曰絕似溫李陸儼山在坐曰分明王章何止溫李蓋指姓名以戲之也坐中皆笑。



# 明詩紀事卷六

丁籤

伍晏一首

晏字時清。清流人。弘治己酉舉人。官平度州訓導。

筆精。清流。伍晏能詩。如草根蛙鼓吹。花底鳥笙歌。閒階秋掃葉。荒徑晚挑蔬。隔寺聞僧磬。微燈認釣舟。俱清雋可喜。

漁滄廟

漁滄之下潭水流。漁滄之上雲悠悠。行雲流水自今古。荒城故壘行人愁。龍爲蛇兮鼠爲虎。腥毛臭骨皆塵土。遊魂寂寞無所歸。時傍寒蛩泣秋雨。

錢福二首

福字與謙。松江華亭人。弘治庚戌第一人及第。授翰林修撰。有鶴灘集六卷。

四庫總目。福少而穎悟。詩文以敏捷見長。故委巷鄙俚之詞。率以歸之。今觀是集。實少俳諧之作。知小說多附會也。田按。修撰雖以敏捷見推。然合格之作。亦頗矜鍊。

立春日齋居對雪

齋居何所作。春雪是佳期。淨入年華淺。光含暝色遲。鳴絃流豔曲。拂簡映新詩。此夕山陰客。扁舟興可知。

元日早朝

暫遂鵷行覲紫宸。九重仙樂奏芳辰。龍樓高拱星河近。鳳歷初頒歲月新。曙色漸分三殿曉。鐘聲散入萬家春。小臣共沐恩波渥。願效華封祝聖神。

靳貴一首

貴字道充。丹徒人。弘治庚戌。第三人及第。授編修。兼司經局校書。歷春坊右中允。左諭德。兼侍講。進太常少卿。掌翰林院事。擢禮部侍郎。以忤劉瑾。左遷光祿寺卿。尋復官。改吏部。進禮部尚書。文淵閣大學士。參預機務。改戶部。進太子太保。武英殿大學士。贈太傅。諡文禧。有戒菴集二十卷。

靜志居詩話。文禧康陵舊學。南巡時臨其喪。命詞臣撰祭文。皆不稱旨。御製一首云。朕居東宮。先生爲傅。朕登大寶。先生爲輔。朕今南遊。先生已矣。嗚呼哀哉。代言者。嘆惜斂手。

送蘭孝先還廣陵

正好論心又欲行。江風不盡別離情。十年交誼晏平仲。一郡才華馬長卿。樹遶帆檣隔瓜渚。天低睥睨見蕪城。相思有意君知否。九曲亭前看月明。



楊日一首

日字晉叔。建安人。太師榮曾孫。弘治庚戌進士。授吏部主事。歷員外郎中。遷太僕少卿。改太常。以忤劉瑾。謫温州知府。遷浙江提學副使。歷應天府丞。順天府尹。擢禮部侍郎。改戶部。督京通倉。出理餉甘肅。進右都御史。總督兩廣軍務。尋掌南院。進南戶部尚書。改南吏部。召拜吏部尚書。未至。勒致仕。有惜陰小稿。

田按三楊子孫。尚書最為通顯。嘉靖初。桂夢張璠以議禮驟貴。且極言不可。會吏部尚書喬宇罷。召以旦代。未至。為給事中。陳洸所劾。勒致仕。時議頗不直。洸且在武城。聞致仕之召。賦詩云。北客忽傳新命下。中流急放一舟還。浮名已謝雲霄上。公道猶存天地間。老遣情懷聊藉酒。閒攜杖履即登山。應知此外無餘事。寂寂松陰晝掩關。具見恬淡之志云。

白馬關

怪石巉巖水亂流。柳勻新綠弄春柔。滿陂芳草眠黃犢。風景居然似建州。

鄭瓘二首

瓘字溫卿。蘭谿人。弘治庚戌進士。授鄒平知縣。改長洲。再改楚雄判官。有蛙鳴集。

田按溫卿詩。任臆發抒。不受模範。蛙鳴集自序云。蛙水族之微也。候至則不得不鳴。候去則不得止。其鳴其止。蛙不得以自由。亦不自知其故。可謂善於自喻。其斫藤詩云。藤蔓傍樹生。曲直善依附。葉葉還枝枝。旦旦復暮暮。遂忘異根株。似謂得援助。欣欣共陽春。濯濯同雨露。始本相扶持。今反生嫉妬。日月被遮隔。乾坤受滓汙。幾微失前知。事極悲晚悟。可謂警切動人。但集

中如此者不可多得耳。

舟中

嶺南病後驚歸晚。連日舟行更逆風。寂寞殘年猶是客。蕭騷短髮忽成翁。晨光峭峭寒侵骨。夜色沈沈雨打蓬。屈指於今三十四。可憐蹤迹漫西東。

惜春

桃花飛盡李花飛。過眼韶光春已非。怪煞杜鵑情太薄。聲聲只道不如歸。

童琥一首

琥字廷瑞。蘭谿人。弘治庚戌進士。授刑部主事。歷員外。郎中。出爲江西按察副使。有梅花集句。和百詠梅花詩。寫懷釣臺拾遺等集。

題畫梅

野塘春煖水平鋪。數點冰花映玉壺。明月一簾詩思好。東風吹夢過西湖。

王統一首

統臨川人。弘治庚戌進士。官同知。

謝家埠

卸卻孤帆野水涯。黃塵撲面走輕車。白沙翠竹不多路。茅屋竹籬凡幾家。山腳雲低烏帽沒。樹梢風颭酒旗斜。眼前景物供詩料。獨有寒梅未肯花。

林夔一首

夔字元佐。莆田人。弘治庚戌進士。官戶部員外。

經趙邊地

地控龍荒險。山連雁塞雄。鼓笳秋月白。榆柳晚霜紅。九塞關河限。千秋頗牧功。烽煙猶未淨。長劍倚崆峒。

劉愷一首

愷字西臬。保定新安人。弘治庚戌進士。授刑部主事。歷鴻臚寺卿。擢副都御史。總督漕運。進兵部侍郎。禮部尚書。有西臬集。

題畫屏

山木風吟翠葉。石壇月冷蒼苔。一曲高山流水。可人今夜誰來。

唐臣一首

臣字堯佐。營山人。弘治庚戌進士。官兩淮鹽運使。有拙菴集。

田按四川經籍志。稱堯佐營山人。費經虞蜀詩。則以爲內江人。余檢弘治題名碑錄。蓋蜀詩誤也。

道林寺

側徑榛蕪轉更高。道林西寺入層霄。龐眉道士曾相識。流水空山話六朝。

梁燾一首

燾字弘宇。南海人。弘治壬子舉人。

寄董宗輔

東江去悠悠。送子孤行舟。舟行復幾時。江鄉生遠愁。采采芙蓉花。欲寄無蹇修。念昔攜手好。中情鬱綢繆。商歌寄逸響。素琴鳴芳洲。無由慰離索。一雁橫高秋。

方玘一首

玘字世重。莆田人。弘治壬子舉人。官南康通判。

野泊

野泊傍沙洲。更深微雨歇。忽聞水鳥聲。推蓬見新月。

張乾一首

乾字尙勤。莆田人。弘治壬子舉人。除分宜教諭。

蘆塘雜興

籬菊有佳色。園禽多好音。應嫌歸計晚。白首始抽簪。

何孟春四首

孟春字子元。郴州人。弘治癸丑進士。授兵部主事。歷員外郎中。出爲河南參政。擢太僕少卿。進本寺卿。以右副都御史。巡撫雲南。遷南兵部侍郎。召拜吏部侍郎。以議大禮。出爲南工部侍郎。尋削籍。隆慶初。贈禮部尙書。諡文簡。有燕泉集十八卷。

餘冬敘錄。丁丑八月之夕。夢侍涯翁坐。翁拂箋欲書。趣春檢詩稿。鬢髯記其一首二句云。金花燦爛錦雲香。上界飛書到幾行。因心動不暇再目。而自續云。風雨忽驚吹面冷。不教清夢看成章。於是遂醒。可異也。

田按子元及西涯之門。觀所著餘冬敘錄。於西涯詩話緒論。媿媿不倦。并夢中亦續西涯詩稿。可謂服膺不忘矣。惟才力稍弱。句調平易。而學殖既深。亦自遠於俗調。今所傳燕泉集十卷。乃其六世孫惟文搜逸輯錄。觀餘冬敘錄所列之詩集。不一見。知非常日完帙也。

責亡奴

爾賤爲人奴。吾與爾何負。家貧食指單。恃爾同駢拇。長日無力作。使令才左右。胡無一旦間。決策背吾走。爾甯有高志。衣食卽父母。奴求免饑寒。理不論好醜。去我何所爲。他人爾何有。亡奴前致辭。公責敢不受。奴心切有懷。不識所歸咎。奴以農爲事。自當力田畝。奴以漁爲事。自當持網筍。置身牙僧間。亦自知秤斗。轉易得數錢。自無虛井臼。所恨日營營。不容停腳手。不如官人奴。安坐得肉酒。困思事主公。豈意一無取。

饑寒僅能救。往事俱落後。主公性多防。日夕在監糾。辛苦自立名。奴輩誰知某。嗟奴言若此。所望亦良厚。爾當初來時。是聽誰何誘。奴職各有司。惟臧獲爲偶。在田漁市井。事事不容苟。昔日王大夫。買僮楊寡婦。聽教千百端。受笞十八九。我雖無贏餘。已脫諸躡蹂。非分豈可希。欲居豐殖藪。豪強力不兼。況爾茲塵垢。而敢生責望。常懷乞漿酒。家人務溫飽。此事誰於狃。奴今有二心。我杖可勝叩。

與李憲副閱西行地圖見崑崙山

神仙非所慕。吾亦到崑崙。地脈應西極。天容向午昏。雪知何代積。山是此方尊。漢使勞相問。黃河豈有源。

大司馬馬公生辰

氣完靈降嶽。申甫定重生。合代天工亮。應逢帝運亨。回瀾須砥柱。程物必鈞衡。經濟惟豪傑。儀刑在老成。四朝裨聖政。羣士聳官評。道協風雲會。功依日月明。廟謨何慷慨。風采極崢嶸。豸服欣初稱。麟袍羨晚榮。詩人歌顯顯。史氏表觥觥。鼎足平無頗。葵心老更傾。經筵深啓沃。章奏極忠誠。醫國三年艾。防邊萬里城。職隆宮傅望。權總夏官卿。朔漠傳威令。高班絕抗行。朱顏霞有暈。華髮雪初盈。金石盟將遍。丹青貌已成。龍章凡幾煥。花甲此時更。短句非云頌。聊申仰止情。

漢宮柳

依依漢宮柳。本不傷離別。何事學顰眉。春來故愁絕。

鄭岳四首

岳字汝華。莆田人。弘治癸丑進士。授戶部主事。改刑部。歷員外。出爲湖廣僉事。遷廣西按察副使。改廣東。歷江西按察使。布政使。以勘事被誣。奪職爲民。尋起。右副都御史。巡撫江西。召爲大理寺卿。進兵部侍郎。有山齋集二十四卷。

東南嶠外詩話。汝華侍郎。著有蒙難錄。其稿本久佚。惟山齋集中。有幽居書懷詩序云。庶人宸濠。久畜異志。予由臬轉藩。裁抑逆曲。濠不能堪。嗾同寮橫加誣訐。威賄上下。文致其辜。逮繫踰年。始得罷歸。憂患中。嘗作蒙難錄。茲摘其概書之。詩云。咄咄日書空。禍階嘅伊始。蟻穴昔何微。潰川浩無埃。數至諒難違。修身以順俟。明夷古所悲。演易在羨里。厲貞乃終吉。齋心悟玄理。豁壑絕險巖。千仞猶可窮。人心如其面。談笑伏兵戎。田灌平生交。酒杯不相容。魏其力解紛。乃進遭禍凶。往事昧明訓。邈哉廉蔣蹤。

蘭陔詩話。公在江西。知宸濠有異志。嘗作詩云。吳淞招死士。密置淆澗間。豈知真將軍。輕車出藍田。逆節竟斧鑕。明鑑垂簡編。其言果驗。

田按汝華。以勘李獻吉與巡按相訐事。獻吉執汝華親信吏。言汝華子沄受賕。宸濠助之。朝議遣大理卿燕忠勘問。兩斥之。因罷爲民。獻吉爲宸濠所助。其曲直不辨自明。汝華非徒風骨嶽嶽。亦留心鄉邦故事。其所輯莆陽文獻。具有經緯。五字詩亦有風韻。

送何子元少宰改任南都

夏秋多霖雨。沈陰翳晨光。積潦斷衢塗。欲濟苦無梁。送子出城闔。策馬登前岡。回飈激流雲。顛氣變清商。

憑高一舒眺。天宇何茫茫。感茲物候異。鬱鬱情內傷。古稱楚多才。弱冠已擅場。博學富文藻。節操誠慨慷。南望鍾山遙。白雲懷帝鄉。風露日夕清。蘭桂發幽芳。與子結綢繆。望望不得將。平生契分深。白首相激昂。浮榮久難恃。萬世一何長。願言保終始。青簡諒毋忘。

和林汝儀招飲溪閣

旭日散林霏。澄波銜山影。離城纔幾許。已覺非人境。几杖松壇幽。雞犬柴門靜。幸逢素心人。高談白日永。

幽居書懷

平生相傾慕。會合意何敦。相期振頽靡。撫乂憫元元。如何自積猜。枝葉傷同根。川洛搆黨禍。善類鮮安存。王導仇伯仁。千載抱煩冤。古來同嘆息。棄置復何言。

蘭陔詩話。此詩為李獻吉作也。公與獻吉同年進士。交好甚篤。及為獻吉所搆。待之如初。觀此詩猶惓惓不忘舊好。後宸濠伏誅。獻吉坐為濠作陽春書院記。小蓬萊詩。獄辭連及。林見素力救之。黃才伯有讀見素救獻吉疏。詩云。憐才不是雲莊老。愁殺中山獵後狼。中山狼傳。乃馬東田所作。以訾獻吉負康德涵者。朱錫鬯以為康李未嘗隙末。然觀獻吉之擠公若此。其於德涵亦可知矣。

古溪亭為盧師陳進士題

晶晶湖光淨。分流到石莊。鳥歸山色暝。風送雨聲涼。秋水茱萸泚。煙蘿華子岡。小詩供日課。幽興一何長。

秦金一首



金字國聲。無錫人。弘治癸丑進士。授戶部主事。歷郎中。出爲河南副使。遷參政。歷山東布政使。以右副都御史。巡撫湖廣。入爲戶部侍郎。改吏部。擢南禮部尙書。就改兵部。入爲戶部尙書。乞歸。起南戶部尙書。召拜工部尙書。進太子少保。太子太保。再改南兵部。卒贈少保。諡端敏。有鳳山詩集十卷。

碧山吟社志。弘正間。社會旣輟之後。司徒鳳山秦公。歸自留都。邀二泉邵公。心泉呂公。惠巖顧公。松閣顧公。藕塘秦公。石村陳山人。結詩會山中。亦以碧山名社。然止就諸公之別墅。如二泉精舍。鳳谷行窩。惠巖小築。次第舉會。蓋亦慕修敬之風。而一寄意焉。

### 題復得竹茶爐卷

竹爐歡喜復歸禪。一別山房五十年。聲入松風還簌簌。夢回湘月共娟娟。僧堂宿火無塵劫。石檻清泉有淨緣。莫怪真公招不返。已將詩卷萬人傳。

### 許天錫四首

天錫字啓衷。閩人。弘治癸丑進士。選庶吉士。授吏科給事中。進工科都給事中。上疏劾劉瑾。遂自經。將以尸諫。或曰。瑾遣人殺之。嘉靖中。追賜祭葬。有黃門稿。

列朝詩集。天錫在詞林。以能詩爲李長沙所稱。嘗題詩車盤驛丹青閣上云。青山當面似無路。黃犢出林還有村。鄭繼之題其後云。風流不見許黃門。文字丹青閣尙存。最憐佳句車盤驛。黃犢青山何處村。

筆精許黃門。正德中奉使安南。於僧寮中得枯木一片。狀若山峯。黃門厚酬主僧。攜歸閩中。自刻詩云。萬年木精化青牛。瘦骨不朽沈江洲。江洲水急魚龍湫。神物始出隨回流。玲瓏峯嶺誰能收。山僧得之溪峒曾。蠻荒僻遠絕賞鑒。木爾韜晦誰怨尤。洞江先生好事者。邂逅願脫千金裘。古今琴材出爨下。拔爾幸免爲人憫。風厓雨谷偕我老。無復夢想仍丹邱。歲久流落士夫家。已百年。不知寶惜。棄之泥滓。予友高景倩博物好古。遂乞以歸。洗刷塵垢。置之齋中。名其齋木山。同社俱有詩紀其事。然竟不知何木也。

田按黃門稿中警句。如居庸關云。鐵騎連三戍。金城迫九關。分水關云。絕巘愁飛鳥。清潭落斷霓。蒼梧閒眺云。越雋西連山。似戟。桂江東注水如苔。晚至平南云。千里家山殘夢斷。一川煙水暮愁生。皆可誦也。

往歲

皇華思往歲。一騎入雲中。笛裏愁人月。霜前落葉風。寒川淘戰骨。野火燎秋空。聞道河西寇。今來欲向東。

胡來

胡來青黍盡。胡去幕南開。日落單于口。秋生李牧臺。陰風吹殺氣。戰骨蝕蒼苔。灑淚向千古。斯人安在哉。

憶江上草亭

每到芳春便憶歸。夢中江國舊斜暉。渚邊舴艋有時放。沙上鷗鷺無數飛。野興頓從官後減。封書更覺病來稀。年華半百堪惆悵。長往山林意轉違。

題畫

三楚秋心萬里流。蕭蕭黃葉滿汀洲。籜冠芒屨詩翁瘦。併作江南一片秋。

陳玉一首

玉字德卿。沂州衛籍。本高郵人。弘治癸丑進士。選庶吉士。改監察御史。出爲浙江提學副使。改福建。歷應天府丞。右僉都御史。擢兵部侍郎。進南左都御史。贈太子少保。

喜雨上金郡刺

亂紅粘溼擁籬根。惻惻餘寒靜掩門。疏雨人家寒食暮。暝煙天色杏花村。西山淨洗新眉黛。東野青回舊燒痕。政喜坡仙在吾郡。一亭虛敞對吟尊。

鄭汝美一首

汝美字希大。閩人。弘治癸丑進士。官戶部員外。

閨情

遠戍來何期。對人休自訴。早晚有佳音。鵲噪門前樹。

方璘一首

璘字文玉。莆田人。弘治癸丑進士。歷官雲南布政使。有鑑湖集。

二月

二月山城未見花，一江春水漫蒲芽。先生睡熟渾無事，閒詠新詩送落霞。

姜芳一首

芳字實夫，蘭谿人。弘治乙卯舉人。除廬陵教諭，遷大理司務。

次董東湖韻

遙隔清江看九峯，白雲來往斷行蹤。跣趺坐到無言處，雲本無心我更慵。

# 明詩紀事卷七

## 丁籤

許讚一首

讚字廷美。靈寶人。弘治丙辰進士。授大名推官。入爲御史。改編修。以忤劉瑾。謫知臨淄縣。瑾誅。起浙江僉事。進副使。改山西提學副使。歷四川參政。按察使。召拜光祿寺卿。遷刑部侍郎。進尙書。改戶部。吏部。進少保。兼太子太保。少傅。兼太子太傅。文淵閣大學士。參預機務。卒贈少師。諡文簡。有松皋集二十六卷。

田按文簡家門鼎盛。予嘗過靈寶。見路旁神道碑林立。皆許氏也。及檢史。乃知襄毅許公。以知兵通敏。位尙書。襄毅八子。三尙書。太子太保。太子太保論。及文簡也。皆以甲科任事。才敏見稱。弇州別集。錄宗門盛事。以福州之林。靈寶之許爲稱首。然襄毅遇劉瑾。以委蛇狗意。不免削籍。文簡遇分宜。以柔和易制。幸躋台輔。李世之居通顯。難矣哉。

## 子夜歌

吳女采白苧。行過芙蓉塘。清波照紅粉。花面兩相當。

劉瑞二首

瑞字德符。內江人。弘治丙辰進士。選庶吉士。授檢討。以忤劉瑾除名。瑾誅。起浙江提學副使。進南太僕少卿。就遷禮部侍郎。卒贈尙書。隆慶初。追諡文肅。有五清先生集十八卷。外臺集六卷。

靜志居詩話。五清先生。正德丁丑。以按察副使。提督浙江學政。廣購經史子集。發十一府儒學。公貯備覽。每冊隸書於序尾。鈐以關防。今各府俱散佚。人間予每每見之。惟湖州府學尙多存者。予家所鈔施宿張昞會稽二志。乃其所儲本也。公有五清先生集十八卷。又外臺集六卷。訪之未獲也。

田按何大復有送五清先生赴浙江提學歌云。天台文宿衝紫霄。先生捧勅馳星輶。越山桃李花萬樹。春色早渡錢塘潮。憶昨先生遭斥逐。淙泊湖湘望巴蜀。九江鴻雁春冥冥。七澤龍蛇晝盤曲。史稱劉瑾用事。瑞卽謝病。貧不能還鄉。依李充嗣於澧。瑾榜瑞爲奸黨。此詩所謂斥逐漂泊。紀其事也。五清集。世所罕見。予從全蜀藝文志。獲詩二首。亟登之。

### 東溪驛

登登山路高還下。馥馥香林淺又深。何處斜陽重回首。東溪寥落百年心。

全蜀藝文志。東溪先生書屋也。

### 播南吟

水交箐裏有猿嘯。聽罷令人思欲迷。聞說近來多虎蹟。行人莫到夕陽西。

### 劉麟四首

麟字元瑞。本安仁人。世爲南京廣洋衛千戶。因家焉。弘治丙辰進士。授刑部主事。歷員外。郎中。出

知紹興府。以忤劉瑾。罷爲民。瑾誅。起知西安府。歷陝西參政。雲南按察使。謝病歸。召拜太僕卿。進右副都御史。巡撫保定。再引疾歸。起大理卿。擢工部尙書。勒致仕。以殿工追論落職。卒。贈太子少保。諡清惠。有集十二卷。

四庫總目。麟集長興朱鳳翔爲序。稱其詩駸駸韋杜。未免太過。至稱其標格高入雲霄。胸中無一毫芥蒂。故所發皆盎然天趣。讀之足消鄙吝。則得其實矣。

藝苑卮言。劉元瑞詩。如閩人強作齊語。多不辨。

田按。坦上翁人品高潔。居朝日。永陵以冰清玉潔目之。可謂知臣莫如君也。前後罷官及謝病。凡四退歸。皆寓長興之濱。南坦營與太白山人孫太初。龍霓。吳充。陸崑。施侃。結社於茗溪。號茗溪五隱。所著興趣天然。頗似擊壤一派。今錄其少矜鍊者。性好樓居。貧不能構。八十初度。文徵仲繪神樓圖贈之。兼繫以詩。朱射陂。楊升菴。相繼有作。並錄於此。徵仲云。僊人謾說愛樓居。咫尺丹青足卷舒。坐守黃庭幽闕迴。讀殘眞誥夜窗虛。游心物外疑無地。寄迹空中樂有餘。一笑闌干不成倚。浮雲奄忽意何如。射陂云。神樓一何峻。神樓峻而安。胡不京洛遊。畏彼峽路間。峽路誠崎嶇。險于太行山。歌以言志。神樓峻而安。升菴云。安期昔製神樓散。射陂今作神樓曲。神樓主人南坦翁。欲往從之限空谷。吾聞仙家五城十二樓。樊桐方丈繞瀛洲。長風引舟不可到。環中根像空神遊。坦翁元是神仙流。何年飄然下丹邱。天庭攜籙拔鸞鶴。雲屏立仗鳴騅驄。北斗南宮不肯住。挂冠歸來營菟裘。碧瀾罨畫開茗霽。紫煙縈帶彩雲夾。新波菱榜泛青翰。過雨蘋風爽烏袷。人間九設播聲詩。天上五龍傳睡法。青李遙看尺牘來。雀羅淨瑤昏眸開。尻輪神馬馳萬里。坐我赤明龍漢臺。一氣孔神存中夜。手翳華芝海若詫。中有真人巾金巾。授以靈文老復姪。玄珠纍纍蒼玉鳴。烽沈析闋歌太平。豐屋天翔鬼瞰室。廟謨何用談佳兵。遊仙夢覺聞清嘯。載寶清潤連清調。願從廣成順下風。肯許襄童親末照。咸池濛汜紛如馳。扶起混沌須神醫。他年合遇神樓散。約公海上尋安期。

留別孫太初

夕燈蛩語上空堂。門外芙蓉繫野航。高興逐雲先到寺。離心入雁不成行。黃花伴客年年雨。短髮彫秋夜夜霜。歧路無情人自遠。酌中戎馬過重陽。

九日

初日輕煙隱薜蘿。轉疑詩句在山阿。道人不上青峰久。黃葉忽隨霜鬢多。獨把菊杯迎物候。故偏風帽起高歌。川原淨好能無雨。如此重陽一謾過。

鷗

城南秋草碧於煙。無數白鷗隨我船。風帆乍舉驚呼去。拍水過溪相對眠。

渡湖

廣文遺韻留樗散。雞犬圖書共一船。自說江湖不歸事。阻風中酒過年年。

劉玉七首

玉字咸栗。萬安人。弘治丙辰進士。除知輝縣。入爲御史。以劾劉瑾繫獄。削籍放歸。瑾誅。起河南僉事。歷福建副使。擢大理少卿。進右僉都御史。提督江防。改巡撫鄖陽。尋再督江防。改理院事。以平宸濠功。進右副都御史。擢刑部侍郎。議大禮忤旨。坐李福達獄。削籍。隆慶初。贈刑部尙書。諡端毅。



有執齋集二十卷

靜志居詩話。侍郎詩娟秀絕塵。比於喬莊簡。似過之。

田按執齋立朝。以風節著。詩特蘊藉。

禽言二首

不如歸去。白日西沈水東注。一身出門千萬歧。擾擾亡羊何處住。不如歸去。惡阿惡阿。山石崎嶇山徑惡。豺狼奔走斷人行。此鳥有情空淚落。惡阿惡阿。

仙村

路轉俄聞雞犬聲。柴扉開處白雲生。插花稚女有嬌態。倚竹老翁無俗情。靈藥雨餘閒自採。好峯雲外畫難成。沿溪剩有桑麻地。擬卜鄰居事耦耕。

神女祠

巫山綽約似新粧。江水縈回空斷腸。花落石壇遺廟在。鶴歸郢樹故城荒。更無詞客瞻雲氣。猶有詩人弔夕陽。欲向麻姑問消息。千年誰見海塵揚。

花

春半春前春後。花紅花白花黃。半吐半開半落。堪憐堪賞堪傷。

秋興

秋杜相邀酒甕開。接羅顛倒坐莓苔。黃鶴唱罷我先醉。紫蟹肥時君再來。

春遊

雪霽輕雲弄日華。偶乘春興過鄰家。小園桃李猶含凍。狼藉東風苦棟花。

張羽五首

羽字鳳舉。秦興人。弘治丙辰進士。除瀘安知縣。擢御史。出知保定府。改邵武。歷河南副使。四川參政。進河南布政使。有東田遺稿二卷。

田按東田集。選家未有及之者。四庫館開。兩江督臣錄進。余得館中副本。其詩專講音節。字句不盡入格。錄其合作。固彬彬乎唐人之雅音也。

晚春舟中

風光二月成虛擲。客路三千鎮獨歸。去國漫憐行日遠。到家常恐見花稀。燈穿夜舫春蟲入。帆過晴沙宿鷺飛。零落當時多少事。東風江上淚沾衣。

次玉岡秋興韻

瀟水烟銷秋日晶。關河風色慘邊情。年光暗惜江蘿晚。秋鬢愁看客鏡明。十道羽書聞夕警。五更城角落

寒聲。季鷹自昔多幽思。不爲鱸魚歎遠征。

寄陳別駕汝耀

三山雁使隔年回。傳道甘棠樹重培。別駕風流餘簿領。郡齋蕭散到蓬萊。榕陰暗處衙聲合。荔子紅時吏俸來。獨向樵川愁病在。好音遲子笑顏開。

客久夢中代內作

梅蘂先春發。山茶寒著花。郎從前日去。蚤晚過長沙。

里人陳生善歌舊嘗識之十五年後再聞其歌因贈

餘音尙憶小梁州。十五年前作漫遊。重倚朱欄歌一曲。楚天涼月在西樓。

黃衷一首

衷字子和。南海人。弘治丙辰進士。授南戶部主事。改北。歷員外。改南兵部。進郎中。出知湖州府。歷福建轉運使。廣西參政。雲南布政使。以右副都御史。巡撫雲南。改湖廣。擢工部侍郎。改兵部。有矩洲集二十卷。

靜志居詩話。矩洲詩若野練晴飛孤嶼白。木綿春試小枝紅。白酒河橋花底社。黃螺沙市艇家兒。處處短牆圍薜荔。家家生計種扶留。鳥際忽開衡岳寺。林端恰下灌江船。桐木歸來津口渡。楊花飛過驛南樓。狀南中風景。歷歷在目。

古別離

側側復惻惻。送君遠行役。攜手出潼關。何時渡沙磧。沙磧路綿綿。胡塵晝暗天。莫辭頻勸酒。動是幾經年。經年嗟馳騖。虜地無芳樹。野曠似連雲。雲深日如暮。日暮氣轉寒。長驅襲可汗。壯夫多遠思。龍劍莫輕看。

熊卓四首

卓字士選。豐城人。弘治丙辰進士。授平湖知縣。入爲御史。以忤劉瑾罷歸。有熊御史詩選。

空同集。余收輯士選詩。得六十篇。皆精細言華。

藝苑卮言。熊士選詩。如寒蟬乍鳴。疏林早秋。非不清楚。恨乏深致。

田按士選詩。不耐多吟。不如錄蕭寥短篇。令人涉想。

送客南還

遙望城南道。青青草色新。春風生錦棹。時送楚江人。

送人赴道州任

月照河臺酒。離情那可消。衡陽飛雁盡。君去更迢迢。

有懷

展卷春日遲。輕陰閉香閣。舊雨人不來。鳥哢閒花落。

書獻吉扇面

遊人歸欲盡流水去何已。高談轉忘情山青雲靡靡。

朱諫二首

諫字君佐樂清人。弘治丙辰進士官贛州知府。改吉安。有蕩南集。

田按君佐家近雁山。故集名蕩南。頗好事。嘗修雁山志四卷。詩亦不俗。

憶靈巖

會到靈巖寺。斜陽帶晚鴉。山童掃僧舍。茗椀對殘花。拄杖看危石。移尊就淺沙。題詩轉相憶。惆悵惜年華。

寄孫南江僉憲

再到山中訪紫霞。紺園衰草夕陽斜。舊時僧鶴歸何處。獨立溪橋數落花。

黃相一首

相字弼甫。莆田人。弘治丙辰進士官九江知府。有一溪集。

謁岳武穆廟

古廟沈沈掩夕曛。西連孤壠結愁雲。金牌卒墮和戎計。鐵騎空回少保軍。萬里鑾輿終北狩。百年基業遂中分。乾坤遺恨依然在。散作秋濤不忍聞。

田按唐士綱有謁岳廟詩。一坏冤土千年血。五國荒城萬里心。亦警句也。

唐錦一首

錦字士綱。上海人。弘治丙辰進士。授東明知縣。擢兵科給事中。以忤劉瑾。謫深州知州。瑾誅。遷南工部主事。歷南刑部郎中。出爲江西提學副使。有龍江集十二卷。

賞梅

劇愛幽芳盡日看。凍雲烘透粉痕乾。吟邊風勁愁聞角。嗅處香清自倚闌。澹拂湘簾橫月影。薄裁吳苧護春寒。含情莫怨相知晚。欲補離騷下筆難。

郭東山二首

東山字魯瞻。掖人。弘治丙辰進士官四川參政。有石崖集。

王士祿濤音集參政詩。如披薪刈楚。叢雜之中。不乏菁秀。五言如哭誠之云。劍外情偏割。後邊淚有餘。送王侍御巡蜀還朝云。停驂劍閣曉。迴雁少城春。七言如甯武關云。古堞寒雲殿晚戍。空壕疏雨散昏鴉。次見素韻云。山迂鳥道連三蜀。棧入雞頭轉七盤。並可誦。

雁門關

關城風色日颼颼。廣武新軍玉壘頭。百晦石田山下業。數聲羌笛戍邊樓。枯沙遠燒憐春望。白草黃雲結暮愁。珍重北門誰管鑰。回中獵騎未全收。

晚赴納溪

急櫓鳴灘赴納溪。牛羊下處亂鳥啼。水田石路壟江上。何日看山獨杖藜。

蔡鳳一首

鳳字乾兆。新喻人。弘治丙辰進士。官監察御史。

守素園

綠槐門巷白蘋洲。吟過春光醉過秋。到眼風花渾是夢。置身邱壑更何求。水流須信石不轉。山靜任教雲自浮。君看萬松枝上鶴。一巢從此占清修。

范兆祥一首

兆祥字延和。豐城人。弘治丙辰進士。改庶吉士。授檢討。以言事下錦衣獄。出爲涇府長史。復以事逮詔獄。謫戍永州。尋放歸。有半松遺稿。

田按延和七歲作登堯山詩。稱神童。以敢言兩下獄。其送人詩有云。入世無官好。沿江有淚揮。亦可悲矣。

分甯道中

寒水澗頭花亂開。燕子石下波縈迴。獨鞭瘦馬截流去。鶴鳥一聲山雨來。

龍霓一首

寬字致仁。南京牧馬千戶所籍。本宜春人。處士瑄子。弘治丙辰進士。官浙江按察僉事。

金陵詩徵。致仁罷官後。入茗溪社。與劉南坦、吳甘泉、陸玉厓、孫太初爲五隱。

姑蘇道中

又從書劍去。旅夢落金閨。野鶴巢難定。春蠶繭自忙。空江鳴急瀨。高樹隱斜陽。歸計何時決。移文動草堂。

楊褫一首

褫字介福。武陵人。弘治丙辰進士。選庶吉士。歷禮、兵、刑三科給事中。以忤劉瑾致仕。瑾敗。起吏科都給事中。歷右通政。進南太僕卿。

桃川

平川臨古邑。野舫隔煙岑。人代有秦晉。風光無古今。吟餘嘯鳥寂。坐久落花深。蓬鬢俄成雪。支筇且漫吟。

陳洪謨一首

洪謨字宗禹。武陵人。弘治丙辰進士。授刑部主事。出爲漳州知府。歷雲南按察使。以右副都御史。巡撫江西。入爲兵部侍郎。贈兵部尙書。有靜芳亭摘稿八卷。

登九江希庾樓

新樓極虛敞。竹樹環陰森。何意塵囂中。有景如山林。昔人盛風致。遺蹟依孤岑。我來坐移晷。冷然滿風襟。



羅鳳一首

鳳字子文。一字汝文。吉安泰和人。南京水軍右衛籍。弘治丙辰進士。除興化推官。遷南監察御史。出爲袁州知府。改鎮遠。再改石阡。有簡齋家藏集十卷。

田按子文守袁州。武宗南巡。自車馬糗糒之外。一無所供。監司問以佃遊之備。近幸之餉。曰非守所宜職。以不勝繁劇。改簡。爲吾黔鎮遠知府。再忤御史。改石阡。請老。自號簡翁。博雅好古。蓄法書名畫。金石遺刻。多至千卷。所居在天印山下。又自號印岡。顧東橋贈詩云。道人築室天印下。邱壑重重到茅舍。謝墅花驕羅綺春。秦淮舟泛星河夜。紀其事也。家藏集。僅有鈔本。流傳甚少。故選家多不之及也。

重遊南山

天涯莽莽寄行蹤。興在溪雲水月中。簿領不妨遊半日。杖藜今又繼諸公。機心誰辨問蕉鹿。歧路直堪擬雪鴻。俯仰悠然成一笑。南山秋色浩無窮。



明詩紀事卷八

丁籤

林廷模一首

廷模字利正永福人弘治戊午舉人官潮州同知有兩江漁唱

田按利正永福人中弘治戊午舉人晉安風雅以為閩人石倉詩選亦誤為貢生余檢福州志殊不爾兩正之

古意

念遠勞魂夢含愁度歲年穿花雙蛺蝶偏傍繡簾前

劉龍二首

龍字舜卿襄垣人弘治己未第三人及第授編修進修撰改兵部主事歷吏部員外尋復修撰遷侍講學士改侍讀擢禮部侍郎進南禮部尚書改南吏部兵部贈太子太保諡文安有紫巖集四十八卷

田按尚書不以詩名紫巖集中佳句如詠淮陰侯云運屬真人應混一才收國士故無雙送楊兵部歸成都云禁中頗牧推司

馬劍外江山待主人。答司徒質齋韓公云。吏部文章原絕代。相州功業早安邊。他如堂前燕子悲王謝。洞口桃花笑阮劉。春水仙舟依岸柳。午風僧磬出煙蘿。笙歌韻歇空啼鳥。羅綺香消自野花。花雨碎時簾半捲。柳煙低處燕交飛。卽當日以聲律擅名者。亦不能過也。

送王元甫還姚江

有客自浙東。長江信所適。片帆鼓天風。千里還瞬息。泊舟石頭城。覽勝入京邑。城中多貴介。冠蓋填紫陌。懷刺不肯投。折腰向誰揖。謂予典春曹。廿年曾舊識。一顧輒盡歡。張燈話深夕。高風凌古人。逸氣脫凡格。照乘安用珠。連城未爲璧。如何抱逸才。乃獨事幽寂。明時苦難逢。流景還易擲。攜酒餞江干。戀戀不忍釋。相望久延佇。暮山倚天碧。

登燕子磯

燕子磯頭拂曙來。秋光催客上高臺。百年風日重陽節。六代江山濁酒杯。病體欲扶驚老態。清時無補愧樗材。不須細把茱萸看。且共諸公笑口開。

劉蒞一首

蒞字惟馨。涪州人。弘治己未進士。授戶科給事中。以忤劉瑾廷杖削籍。瑾敗。起金華知府。告歸。再起知長沙。遷江西副使。均未赴卒。有秋佩先生集四卷。

田按惟馨於正德初劾劉瑾馬永成谷大用張永魏彬邱最羅祥傅輿等云此輩投閒抵隙誣上行私一言一笑都有機關一止一行揣知上意府庫錢帛用如泥沙玉帶蟒衣施及童稚章奏落其掌握機務因之自決敗祖宗之家法傷清朝之治化累陛下之初政成天下之禍亂若失今不言異日禍端養成亂本固牢事已無及貴將誰歸史但稱劉健謝遷去位滯與刑科給事中呂紳各抗章乞留語侵瑾廷杖削籍於惟馨事實首尾尙未完備秋佩集世罕傳本四川通志亦未知其卷數余獲此集亟登一詩詳錄劾瑾等疏語以補史闕

### 酒後

洞天昨夜吼蛟龍。吸盡西江未放空。李白劉伶呼不起。酒旗莫再惹東風。

### 林廷楫一首

廷楫字利瞻。閩人。弘治己未進士。授兵部主事。歷員外郎。中出知蘇州府。歷雲南江西參政。湖廣布政使。以右副都御史巡撫保定六府。擢南兵部侍郎。召拜工部侍郎。進本部尙書。贈少保。諡康懿。有小泉錄稿。

### 寄友

停舟江上憶逢君。紫鳳青鸞迴不羣。此日相思空有夢。隔江春色暮山雲。

### 孫緒二首

緒字誠甫。故城人。弘治己未進士。累官太僕寺卿。有沙溪集二十三卷。

四庫總目孫緒無用閒談有曰文章與時高下人之才力亦各不同今人不能爲秦漢戰國猶秦漢戰國不能爲六經也世之文士尺寸步驟影響摹擬晦澀險深破碎難讀云云其意蓋爲李夢陽發可以見其趨向矣其詩格頗近李東陽而深以何孟春等注東陽樂府稱其過於李杜爲非蓋譏譽者之溢量非排擊東陽也

妾薄命

妾命薄如紙君意陌上塵妾意江邊水陌塵易飛揚江水絕清泚京兆多傾城永別從今始京兆猶自可莫入臨邛市

池亭晚坐有懷

池上晚成趣雨餘涼不禁溼雲低閣水癡霧遠迷林去鳥憑誰辨哀蛩識此心美人在何處良夜自沈沈

周倫三首

倫字伯明崑山人弘治己未進士授新安知縣入爲御史歷南大理寺丞進少卿擢都察院僉都御史提督操江歷南工部兵部侍郎進南刑部尙書召拜刑部尙書復改南贈太子少保諡康僖有貞翁淨稿二十卷

梅花草堂集公懸車引年嘗遊武林子大理丞鳳鳴侍而張通參襄亦侍其尊祁州翁聯艦合樽四韻齊下積篇成帙題曰西湖倡和錄列卿紀尙書行草逼真晉人

送徐錦衣

錦衣南躍馬。萬里嶺雲長。三月辭京國。中途是故鄉。龍光金節重。劍氣鐵衣涼。聖主綏柔意。蠻煙草樹荒。

發揚州

揚州已二月。寒色帶蕭森。夜雨太無賴。瓊花定不禁。驛船千里夢。客路五更心。迢遞長江隔。雲天雁字沈。

鄧尉山房

行看一水來天目。坐見千峯湧太湖。嘯鳥不知遊客至。閉關唯有定僧孤。鏡中水月俱清寂。象外煙雲乍有無。勝地久懷來較晚。買山真欲辦青蚨。

謝廷柱二首

廷柱字邦用。長樂人。弘治己未進士。除大理評事。歷官湖廣按察僉事。有雙湖集。

靜志居詩話。邦用詩。如犀塵在握。不染游塵。

田按雙湖詩饒清趣。微傷婉弱。

宿驛頭鋪鄒家風雨達旦次韋蘇州郡齋韻

茅檐一夜雨。歲暮千山客。朝來涉前溪。不見釣磯石。僕夫憂遠道。野館謀今夕。千丈陟霜崖。風寒少行迹。

都穆一首

穆字元敬。吳人。弘治己未進士。授工部主事。歷禮部郎中。乞休。加太僕少卿。致仕。有南濠詩略。  
國寶新編。元敬清修博學。網羅舊聞。考訂疑義。多所著述。齋居蕭然。樂奉賓客。銜杯道古。以永終日。詩雖過爾。沖泊。竟非俗具。  
田按元敬博雅。纂述舊聞。多裨考證。詩話一卷。不甚當家。而邵二雲題後云。南濠舊話新傳得。吳下風流楚地聞。我是間官忙。  
裏過。湖山回首遽思君。亦許其網羅舊聞之勤耳。

渡桑乾

西風早蕭蕭。催我玄鬢皤。祇役發皇邑。川原屢經過。金龍池畔水。演作桑乾河。東馳入滄海。浩蕩成洪波。  
誰知稽天流。發源始盈科。覽茲感幾事。防微當若何。

張鳳翔一首

鳳翔字光世。洵陽人。弘治己未進士。除戶部主事。有伎陵集六卷。

列朝詩集。光世詩信手塗抹。不經師匠。如村巫降神之語。而獻吉作傳。以爲子安再生。文考復出。關中人黨護曲論。不惜人嘔。  
噓。皆此類也。

靜志居詩話。伎陵集洵無足錄。牧齋謂獻吉黨護作傳。然其集本。獻吉評點。初不假借。不以爲近俳。卽以爲太實。黨護之論。殊  
不其然。

田按光世沒。楊遂庵屬邊庭實。整頓遺集。庭實覆遂庵書云。光世詩文章。叢雜無序。脈絡難尋。若理亂絲之糾結。極力整頓。各  
依體製。釐爲六卷。今所傳伎陵集。蓋庭實所訂也。獻吉爲作佳傳。而又於伎陵集。指謫其失。一以殉友誼。一以著公評。我輩今  
日。取伎陵集而評隲之。早已墮獻吉彀中。



湘妃祠

虞帝南征不復歸。湘君日暮嗥青衣。秋風娜娜湘水冷。愁雲化作清霜飛。清霜著草草欲死。著竹竹黃印斑紫。蒼梧雲色凝不流。夫君渺渺雲上頭。曼聲浣月正愁絕。何處雌凰聲不歇。蟠龍起舞潭水波。幽吟咽咽生盤渦。癡雲作雨老天泣。竹中奈此雙愁娥。

陳伯獻二首

伯獻字惇賢。莆田人。弘治己未進士。歷吏科給事中。以忤劉瑾削職。瑾誅。起廣西提學副使。有峯湖集。

蘭陔詩話。峯湖居諫垣日。因疏逆瑾罪削職。瑾敗起視學粵西。以母老乞歸。結茅蓮花峯下。游情藝苑。興致翩翩。畫宗摩詰。詩品在錢、劉之間。

登雨花臺

帶郭林巒屬上方。寶幢說法事茫茫。荒臺僧去天花盡。古殿春來貝葉香。煙散江關開楚越。劫餘碑誌認齊梁。茗新泉冽能留客。細炷爐熏話日長。

分守到廉州途中書事

計日星軺度遠岑。西風旅思費長吟。山多不礙歸家夢。地僻長懸戀闕心。嶺外草黃生毒瘴。海門日出破

層陰還珠合浦留清譽。誰識遺殃直到今。

李廷梧二首

廷梧字仲陽。莆田人。弘治己未進士。授桐鄉知縣。入爲御史。進大理寺丞。有壺塘集。

送人休致

漫將春浪浣塵衣。天馬如今不受鞿。旅客豈堪千里別。故鄉初見一人歸。薰風驛路黃鸝語。細雨湘雲紫蕨肥。回首都門聯舊侶。江湖應有寸心飛。

程銓一首

銓字瑞卿。永康人。弘治己未進士。官四川副使。

秋夜

砌冷草蟲喧。月明如積雪。美人不可期。空林墮殘葉。

胡文璧一首

文璧字石亭。耒陽人。弘治己未進士。授戶部主事。歷員外。改監察御史。進太常少卿。出爲鳳陽知府。改保定。遷天津兵備副使。以事下獄。謫延安檢校。起四川副使。

鹿歧晚渡

鹿歧官柳晚煙凝。十里蒼茫野色澄。沙嘴喚船歸渡客。嶺頭持鉢入雲僧。城樓隔岸傳昏柝。漁艇連江起暮燈。天畔一輪新月上。泠泠冰玉洗棱層。



國家圖書館



004759981



86

籍